

Hesu - Otomi, Querétaro

Ar hoga mhö bi 'yot'a

AR MARKO

Ar Xuwa Xixthe mi mönga ar hoga mhö

(Mt. 3:1-12; Lk. 3:1-9, 15-17; Jn. 1:19-28)

1.1 Ár ndui ár hoga mhö ar Hesuskristo ár T'ü Jö.

1.2 Ngu bi 'yot'a ar m'ehni Isaia:

Hyandi di pehna ma m'ehni da m'et'o habu gi pa,
da m'et'o da hyok'a ar 'ñu.

1.3 Ár mhafi n'a togo enga har ot'at'ohö:

Hyojwü ár 'ñu ar tsi Hmu; jömfu habu da thogi.

1.4 Ar Xuwa mi xixthe ya jö'i har ot'at'ohö, ne mi xipabi ar hoga mhö, ne nuyü nda 'yot'wa yá ntso'mi
ne nda mpumbabi yá ts'oki.

1.5 Ne mi ponga ya jö'i mi e nda zü ar Xuwa, gatho nu'u mi 'bü har hnini Herusalen ne nu'u ma'ra ya
hnini har hai Nhudea, mi damajöni yá ts'oki, ne mi xixthe'ö har döthe Hordan.

1.6 Ar Xuwa mi hö n'ar he xki njumpa ár xi n'ar meti ár thuhu kameyo ne xki m'e, ne mi ngut'a n'ar
ximhni, ha mi tsi ya mangak'oto ne ar t'afi mi t'inga har t'ohö.

1.7 Ne mi mönga ar hoga mhö mi enö:

—'Befa n'a xa tökagi ár ts'edi, hindi 'ñepkagi ga xot'wats'u ár thiza.

1.8 Nuga xta xixthe'ihü har dehe, ha nö'ö ma da xixthe'ihü hár Hñö Jö.

Ár nxixthe ar Hesu

(Mt. 3:13-17; Lk. 3:21-22)

1.9 Nuya pa'ü ba e ar Hesu ba ponga har hnini Nasare har hai Ngalilea, ne bi xixthe ar Xuwa har döthe
Hordan.

1.10 Nep'ü mi bonga har dehe, bi hyandi bi xo mhets'i, ne ár Hñö Jö ngu n'ar domtxu ba köi bi züdi.

1.11 Ne bi nheki n'ar mhö ndi 'ñe mhets'i mi enö:

—Go ma hmöka T'ü'i, gi jakagi ga njohya.

Ar ts'ondöhi mi tsata ar Hesu

(Mt. 4:1-11; Lk. 4:1-13)

1.12 M'efa ár Hñö Jö bi zixa ar Hesu har ot'at'ohö.

1.13 Ne ba 'buhnü yon'ate mpa, har ts'ondöhi mi tsatnü. Ba 'bü mateda ya zu'we, ha nuyá enxé Jö mi
pepabi.

Ar Hesu bi dü'ma ár 'befi

(Mt. 4:12-17; Lk. 4:14-15)

1.14 Nú'mü mi njot'a ar Xuwa har fadi, ar Hesu bi menga Ngalilea mi mömba ár hoga ts'ut'wi Jö.

1.15 Mi enö njawa:

—Xi zo ar pa xki mhö, ne ár ts'ut'wi Jö 'bap'utho. 'Yothwü ár ntso'mi, ne ñ'emüihü ar hoga mhö.

Ar Hesu bi zohna goho ya nguxhwö

(Mt. 4:18-22; Lk. 5:1-11)

1.16 Mi k̄ata hár ñöni ar ñh̄onthe Ngalilea, ne bi hyanda ar Simu ne ar Andre ár jödöp'ü, mi köt'a yá nt'ats'i har dehe, ngetho ma ya ngxhwö.

1.17 Ne ar Hesu bi 'ñembabi'ü:

—Ba e gi tengagihü, ne ga ex'ahü gi juxü ya jö'i.

1.18 Dama bi zop'ü yá nt'ats'i'ü bi ðeni.

1.19 Bi ñ'o man'a tsi tui ar Hesu, ne bi hyanda ar Hakobo ne ar Xuwa ár jödöp'ü'ö, yá t'ü ar Sebedeo.

Nuyü mi tohnu har motsa mi pot'a yá nt'ats'i.

1.20 Dama bi zohni, ne nuyü bi zop'ü ar Sebedeo yá dada'ü, mi tohwi yá 'bego har motsa, ne bi ðeni.

N'ar ñ'ohö mi nthexkwi n'ar ts'ondöhi

(Lk. 4:31-37)

1.21 Bi zoñ'ü har hnini Nkapernaum, ne ar pa ntsaya bi yut'a ar Hesu ha yá nijö ya xodyo mi uti.

1.22 Nu'ü togo mi ots'e mi 'yoda ár nt'uti, ngetho mi ñö ngu n'a pe'sa ár ts'edi, hinge ngu nuya böt'ofö.

1.23 Ha mi 'buhnu n'ar ñ'ohö ha yá nijö'ü mi nthexkwi n'ar ts'ondöhi, n'a mbi hyexta n'ar mhafi,

1.24 bi 'ñenö:

—Tema gi pekwa, Hesu me Nasare. Hage xka e gi hwatkagihe. Di pödi togo'i, ár hoga T'ü Jö.

1.25 Nunar Hesu bi zui ne bi 'ñembabi:

—Kot'a ri ne, ne poni hye nunar ñ'ohönu.

1.26 Ha nunar ts'ondöhi bi hwö'sa nunar ñ'ohö, ne bi hyexa n'ar mhafi bi boni bi zop'ü.

1.27 Gatho xa mi 'yotho, ne mi ñöxhnatho mi eñ'ü:

—Ter mehnu'pya. Tema 'ra'yo nt'utinü 'mü. Pe'sa ar ts'edi 'bepa ya ts'ondöhi, ne nuyü ote.

1.28 Ne ngut'a bi nunga ár 'bede xoge hár nthet'i ar hai Ngalilea.

Ar Hesu bi othebi ár to ar Simu Pedro

(Mt. 8:14-15; Lk. 4:38-39)

1.29 Mi bonga hár nijö'ü, bi ma hár ngu ar Simu ne ar Andre, bi mewi ar Hakobo ne ar Xuwa.

1.30 Ha nunar to ar Simu mi 'benü mi the ar mpat'i, ne ngut'a bi nsipabi ar Hesu.

1.31 Nu'mü bi wat'i bi mipa ár 'ye bi guts'i, ne dama bi hñöka ár mpat'i, ne bi nangi mi umbabi te nda zi'ü.

Ar Hesu bi othe nze ya ðathi mi yu ar hyadi

(Mt. 8:16-17; Lk. 4:40-41)

1.32 Mi taknde, ja xki yu ar hyadi, ba ts'impa gatho ya ðathi ne nu'ü mi nthexkwi ya ts'ondöhi.

1.33 Gatho ya mengunü xa mi ñ'ent'i bi wat'a har goxthi.

1.34 Ne bi othe nzeye tsant'ö ar hñeni mi pets'i, ne bi 'yenga nzeye ya ts'ondöhi, ne himi hegi nda ñö, ngetho mi pö'ü togo'ö.

Ar Hesu bi ñ'o xoge har hai Ngalilea mi mönga ar hoga mhö

(Lk. 4:42-44)

1.35 Ár hyax'ö ar Hesu bi nanga n'itho nú'mü mi nxuitho, bi ma ba apa Jö ha n'ar hai hinto mi 'bui.

1.36 Ar Simu ne nu ma'ra mi ñ'owi, bi ma ba honi.

1.37 Ne mi dini bi 'ñembabi:

—Gatho ya jö'i hoñ'a'i.

1.38 Nö'ö bi 'ñembabi'ü:

—Möhö ma ga tsoñhu ma'ra ya hnini ha ya nthet'i, ga xipabi'ü ar hoga mhö n'ehe, ngetho ge'ö xta ehe.

1.39 Ne bi ñ'o xoge Ngalilea, mi kut'a ha yá nijö, mi mönga ar hoga mhö ne mi engä ya ts'ondöhi.

Ar Hesu bi othe n'a mi tsu ar tsit'ando'yo

(Mt. 8:1-4; Lk 5:12-16)

1.40 Ba e n'ar n'ohö mi tsu ar tsit'ando'yo, bi ndandihmö ne mi apa ar möte mi embi:

—Nu'mu gi ne, da tsä gi othe gi.

1.41 Ne ar Hesu bi ko ár nhwëki, bi maka ár 'ye bi hñu'spabi, ne bi 'ñembi:

—Hö, di ne ga othe'i. Dá dix'a'i.

1.42 Nu mi mönga njap'u, nu ar tsit'ando'yo dama bi hyegi, ne bi dits'i.

1.43 Nu'mu xa mi pembabi, ne bi mehni nda ma.

1.44 Ne bi 'ñembabi:

—Ha gi ode, hinto ma gi xipabi. Hõse di ma ba n'udi da hyant'a ar möjö. Ne gi hñöxa ar m'õnhö, gi jut'a ri nt'axki ngu bi mönga ar Moise, njap'u da bö'u xi dix'i.

1.45 Ha nu mi ma'ö, xa to gatho mi xipabi, ne bi 'yonga ar 'bede nö'ö tema xki thogi. Jange ar Hesu himi tsä nda yut'a har hnini xiñho. Mi kota ha ya hai hinto mi 'bui, ne ka mi panu ya jö'i ma nda zudi. Nuya jö'iyu hagatho ya hai mi ehe.

Ar Hesu bi othe n'ar dathi xki nza ár ndo'yo

(Mt. 9:1-8; Lk. 5:17-26)

2.1 Xki tho 'ra ya tsi pa, ne ar Hesu bi yut'a man'agi har hnini Nkapernaum, ne bi födi mi 'buhnu har ngu.

2.2 Ne dama bi wat'a nze ye ya jö'i. Himi tsudi nda yut'a har ngu, mödi nda m'ata har goxthi, ne nunu mi xipabi ar hoga mhö.

2.3 Nu'mu ba e 'ra ya n'ohö mi honi, mi tsi n'ar n'ohö xki nza ár ndo'yo, mi njunga goho mi muts'i.

2.4 Nuya jö'i xa mi nze ye, himi tsä nda yut'i. Jange bi xos'u n'a xeni ár m'et'e ar ngu, ne ka bi gö'mnu har oki nunar fidi mi oxa ar n'ohö xki nza ár ndo'yo.

2.5 Ar Hesu mi hyandwa yá jamfi nu'u togo mi tsihi, bi 'ñemba ar n'ohö xki nza ár ndo'yo:

—Ndada, xi mpump'a ri ts'oki.

2.6 Mi 'buhnu 'ra ya böt'ofö, mi 'yoxa njap'u mi ense ha yá mfeni:

2.7 Yo'ö nõ njap'unu. Ts'okwa Jö. Hinjo'o man'a tsä da pungya ts'oki, hõse Jö.

2.8 Ar Hesu mi pötwatho yá mfeni ne te gatho mi beñ'u, jange bi 'ñembabi:

—Yo'ö te gatho gi benthü ha ri mfenihü.

2.9 Temar ñhembabi ga embabi nunar n'ohõnu xi nza ár ndo'yo: Xi mpump'a ri ts'oki, wa ga embabi:

Nangi, juxa ri fidi, di ma.

2.10 Pöhüpya, Nö'ö Togo ba e bi Njö'i pe'skwa ar ts'edi har ximhai da pungya ts'oki, nuhü teme ma ga pefi.

Ne bi 'ñemba nö'ö togo xki nza ár ndo'yo:

2.11 —Nu'ge di xi'a'i: Nangi, juxa ri fidi, di ma ri ngu.

2.12 Nu'mu nö'ö dama bi guxa ár fidi, bi thota mateda ya jö'i bi ma. Gatho xa mi 'yotho mi nsundabi Jö mi eñ'u:

—Hiñham'u xta hanthü n'ar nt'udi njanu.

Ar Hesu bi zo ar Lebi nda deni

(Mt. 9:9-13; Lk. 5:27-32)

2.13 M'efa ar Hesu bi mengi bi ma har ñõnthe, ha nuya jö'i mi e nda zudi, ne nö'ö mi uti.

2.14 Nú'mu mi thohnu, bi hyanda ar Lebi ár t'u ar Alfeo, mi huxnu habu mi njut'a ar bojö mi jot'a ya ndö, ne bi 'ñembabi:

—Ba ehe tengagi.

Ha nö'ö bi nangi bi deni.

2.15 M'efa ar Hesu bi ma hár ngu ne bi hñu har mexa. Bi wat'a nzēye ya njotbojõ ne ya 'yot'ats'oki, mi huhwi ar Hesu mahyegiwi yá maxte, ngetho mi ja nzēye togo xki deni.

2.16 Ha nuya bõt'ofõ ne ya denga'bepate, mi hyandi mi ñungwi ya njotbojõ ne ya 'yot'ats'oki, bi 'ñemba yá maxte:

—Tema di bompyanu, ñungwi ya njotbojõ ne ya 'yot'ats'oki.

2.17 Ar Hesu mi 'yo njap'u, bi 'ñembabi'u:

—Nu'u 'yomaño hingi hongga togo da othe, ha nu'u hñeni hö, hoñ'u. Hinxta e ga zo ya hogajõ'i, xta e ga zo ya 'yot'ats'oki da 'yot'wa yá ntso'mi.

Ar Hesu bi t'amba ar bēhē

(Mt. 9:14-17; Lk. 5:33-39)

2.18 Nuyá maxte ar Xuwa Xixthe ne yá maxte ya denga'bepate, xki nzõi mi bē'u. Jange n'agi ba e 'ra, bi 'yamba ar Hesu:

—Yo'õ yá maxte ar Xuwa Xixthe ne yá maxte ya denga'bepate bēhē, ha nuya ri maxte hingi bēhyu.

2.19 Ar Hesu bi 'ñembabi:

—Hage tsã da bē nu'u togo xi ts'ohna ha n'ar ngo ne huhwi nõ'õ togo xi nthõti. Hingi tsã da bēhyu, ngetho 'buhwi togo xi nthõti.

2.20 Xta zõhmõ ya pa da ts'imbabi; nu'mú hö, xi inda nehmõ, da bēhyu.

2.21 Hinjo'o togo ju n'ar 'ra'yo m'ot'e pota n'ar ze dutu. Ngetho nu xta yut'a ar 'ra'yo m'ot'e, da gut'a ar ze dutu ne da xē dõta xeni.

2.22 Hinto xit'a ar 'ra'yo t'afi ha ya ze ximhni. Ngetho nu'mú da jap'u, nunar 'ra'yo t'afi da xeka ya ze ximhni, ar t'afi da nõ'mi ne da m'e ya ximhni. Jange ar 'ra'yo t'afi nsit'a ha ya 'ra'yo ximhni.

Yá maxte ar Hesu bi doka ya ngõt'ei har pa ntsaya

(Mt. 12:1-8; Lk. 6:1-5)

2.23 N'ar pa ntsaya ar Hesu bi tho ha ya hwõhi. Nuyá maxte nú'mú mi thohnu, bi ndui bi dokwa yá ngõhõ ya t'ei.

2.24 Nu'mú nuya denga'bepate bi 'ñembabi ar Hesu:

—Ndimhõ, yo'õ pehyu nõ'õ hingi ho da mē har pa ntsaya.

2.25 Nõ'õ bi 'ñembabi'u:

—Ha hinxka nehu nõ'õ bi mē ar Dabi nú'mú mi the ar ñhuni, ne bi zuhwi ar thuhu gathõ nu'u mi ñ'owi.

2.26 Bi yut'a hár nijõ Jõ nú'mú mar döngamõjõ ar Abiatar, ne bi zi ya thuhme xki 'bõ'spa Jõ, nõ'õ hingi ho to gathõ da zi, hõnsē ya möjõ. Ne himbi zise'õ, bi hyemba yá ñ'owi.

2.27 Ne ar Hesu bi 'ñembabi'u n'ehe:

—Nunar pa ntsaya bi thoki ngetho mi hongga ar ñ'õhõ, hinge ar ñ'õhõ bi thoki nge'õ mi hongga ar pa ntsaya.

2.28 Jange Nõ'õ Togo ba e bi Njõ'i, gehnu ár Hmu ar pa ntsaya.

Ar ñ'õhõ xki 'yot'a ár 'ye

(Mt. 12:9-14; Lk. 6:6-11)

3.1 Man'agi ar Hesu bi yut'a ha yá nijõ ya xodyo, ne mi 'buhnu n'ar ñ'õhõ xki 'yot'a n'ár 'ye.

3.2 Ne nuya jõ'i mi õthõ, mi ne nda hyandi ha nda othe nunar dathi har pa ntsaya, ne nda dini te nda hyox'u.

3.3 Nu'mú nõ'õ bi 'ñemba ar ñ'õhõ xki 'yot'a ár 'ye:

—Nangi, 'bã madetho.

3.4 Ne bi 'yamba nu'u mi 'buhnu:

—Teme xiñho da t'ot'a har pa ntsaya, ar ñho wa ar ts'om'ui. Ha da t'õthe n'ar dathi, wa da thegi da du.

Gatho bi ñhetho.

3.5 Nu'mú nõ'ö bi mbo ár kwe bi ñhanda hár nthet'i, bi du ár mui ngetho xa mi kotyá mui, ne bi ñemba nunar ñ'ohq:

—Maka ri 'ye.

Nõ'ö bi maki, ne dama bi dits'i bi m'ui xiñho.

3.6 Nu mi bonga ya denga'bepate, bi ñ'ut'wi yá ñ'ohu ar Erode hanja nda tsa nda hyo'u.

Nzeye ya jö'i mi 'buhwi ar Hesu hár ñöni ar ñhontho

3.7 Ha nu ar Hesu bi mewi yá maxte hár ñöni ar ñhontho. Ne bi denga nzeye ya jö'i, ya me Ngalilea, ya me Nhudea,

3.8 ya me Herusalen, ya me Idumea, nu'u mi 'bu 'randi ar döthe Hordan, ne nu'u mi 'bu hár nthet'i ar hnini Tiro ne ar Sidon. Xki zo yá gu'u mi ot'a ya döta nt'udi, nzeyeyu ma ba k'öni.

3.9 Ar Hesu bi ñemba yá maxte nda ñhok'u di pe'sa n'ar motsa nú'mu mi mahyoni nda bot'se, ne hinge nda 'yent'a ya jö'i.

3.10 Ngetho xki othe nzeye ya jö'i, jange gatho nu'u mi hñeni, xa mi ñ'ent'i mi ne nda dani.

3.11 Ha nuya mi nthexkwi ya ts'ondöhi, nú'mu nda hyandi, mi ndandihmö hár wa'ö, ne mi mafi mi eñ'u:

—Nu'ge go ár T'u'i Jö.

3.12 Nõ'ö xa mi tsui hinge nda möñ'u togo'ö.

Ar Hesu bi hwahna nu'u 'ret'amayoho yá mpote

(Mt. 10:1-4; Lk. 6:12-16)

3.13 M'efa bi boxa har t'ohq, ne bi zohna nu'u togo mi ne'ö, ne nuyu bi ma ba tsudi.

3.14 Ne bi hñuxa 'ret'amayoho nda ñ'owi, ne nda mehni ma nda mönga ar hoga mhö.

3.15 Ne nda me'sa ar ts'edi nda othe ya hñeni, ne nda 'yenga ya ts'ondöhi.

3.16 N'a'u ar Simu nõ'ö bi hñu'spabi ar Pedro,

3.17 ar Hakobo ár t'u ar Sebedeo, ne ar Xuwa ár jödö ar Hakobo, gehyu bi thu'spabi ya Boanerges, ne da ñ'enö: Ya bötsi di hñöxa ár hñeti ar ñuni;

3.18 ar Andre, ar Lipe, ar Bartolo, ar Teo, ar Toma, ar Hakobo ár t'u ar Alfeo, ar Tadeo, ne ar Simu togo xki ñ'owi nu'u mi ntuhni mi ñönga ár hnini,

3.19 ne ar Huda Iskariote nõ'ö togo bi da. Ne mi wadi bi hwañ'u, bi menk'u habu mi 'bu'u.

Ar ñömañ'u t'emba ár Hñö Jö

(Mt. 12:22-32; Lk. 11:14-23)

3.20 Nu mi zoñ'unu, xa bi wat'a ra nzeye ya jö'i man'agi, himi hegi nda ñuni.

3.21 Nu mi 'yo yá mēni ar Hesu, ba e'u nda zits'i, ngetho mi eñ'u xi 'be ár mfeni.

3.22 Nuya bö't'ofu xki ñe Herusalen mi eñ'u mi pe'sa ar Belsebu, ne mi hömpa ár ts'edi ár ndö ya ts'ondöhi, njap'u mi enga ya ts'ondöhi.

3.23 Ar Hesu bi xipabi nda wat'a ya jö'i, ne mi ut'u m'ede, mi enö:

—Hanja tsa ar ts'ondöhi da ñ'ense.

3.24 Nu'mu n'ar hnini da ntunse, da nhwati.

3.25 Ne nu'mu nu'u togo 'bu ha n'ar ngu da ntunse, da ñhege.

3.26 Ne nu'mu ya ts'ondöhi da mpoxkwe ne da ñhege, da nhwatase.

3.27 Hinto tsa da yut'a hár ngu n'ar ñ'ohq xa ja ár ts'edi, ne da bëpa yá ñho nu'mu hinxi xot'e m'et'o.

Nú'mu xta wadi da xot'e hö, da tsa da bëpa yá ñho.

3.28 Xa majöni di xi'ahu, gatho yá ts'oki ya meximhai ma da mpumbabi, ne tsant'ö ar ts'ate xi mö.

3.29 Ha nõ'ö togo da 'yemba ar ñömañ'u ár Hñö Jö, hinda ma da mpumbabi. Xi t'ekwabi ar mfej

hiñham'ụ da thege.

3.30 Bi 'ñembabi njap'ụ ngetho xki 'ñeñ'ụ: Xi nthexkwi n'ar ts'ondöhi.

Ár nönö ne yá jödö ar Hesu

(Mt. 12:46-50; Lk. 8:19-21)

3.31 M'efa ba ehnu ár nönö ne yá jödö, himbi tho'ụ, bi gota nthi, ne bi meñ'ụ togo nda zofo.

3.32 Nu'ụ togo mi hu har nthet'i habu mi hu'ö, bi 'ñembabi:

—Ri nönö ne ri jödö bi 'ba nthi, hoñ'a'i 'nö.

3.33 Ne nö'ö bi dödö:

—Togo ma nönö ne ma jödö.

3.34 Bi k'öt'a nu'ụ mi hu hár nthet'i'ö, ne bi 'ñenö:

—Xi 'bukwa nu'ụ togo ma nönö ne ma jödö.

3.35 Ngetho gatho nu'ụ togo ot'a ngu mönga Jö, go gehyü ma jödö, ma nju ne ma nönö n'ehé.

Ár 'bede ar mot'i

(Mt. 13:1-23; Lk. 8:4-15)

4.1 Ar Hesu bi du'ma man'agi bi uta ya jö'i har ñönthe. Ne bi got'atho nzeye ya jö'i, xa mar nzeye.

Jange nö'ö bi yut'a har motsa ne ka bi hñuxnu, ha gatho ya jö'i mi 'bata har ñönthe.

4.2 Ne te gatho mi ut'ụ m'ede, ne njap'ụ mi utwabi'ụ ár nt'uti, bi 'ñembabi'ụ:

4.3 —Yoxu nö'ö ma ga xi'ahü: N'ar mot'i bi boni ma ba mpot'i.

4.4 Ne nú'mü mi mpot'i, n'a tui bi zo har 'ñu, ba e ya ts'int's'ụ bi go bi za.

4.5 Man'a tui bi zo ha ya do habu himi köxa nzeye ar hai. Ngut'a bi k'ont's'i ngetho himar mpidi ar hai.

4.6 Nú'mü mi boxa ar hyadi, bi hwixki, ne bi 'yot'i, ngetho himi tsá nda nunga yá 'yü.

4.7 Man'a tui bi zo habu mi ja ya 'mini. Ne nu mi te nuya 'mini, bi xuhña bi ot'i ne hinte bi uni.

4.8 Man'a tui bi zo habu mar ñho ar hai, ne bi unga n'ar hoga sofo, bi k'ont's'i ne bi te. Bi unga n'atema'ret'a, hñun'ate ne n'anthebe n'a ngu n'a ar 'bai.

4.9 Ne bi 'ñembabi'ụ:

—Nö'ö togo tu ár gu, dá 'yoxa nö'ö di mö.

4.10 Nú'mü mi m'use nu'ụ mi teni ne nu'ụ 'ret'amayoho yá maxte, bi 'yambabi tema ndi bonga nunar 'bede'ö.

4.11 Ne bi 'ñembabi'ụ:

—Nu'ahü xi ut'ahü Jö nö'ö hinxi fö mam'et'o tengü ár ts'ut'wi, ha nu ma'ra hindi ñ'ohü, di utam'ede.

4.12 Ne xta hyandi, hinda bödi ter me'ö, nu xta 'yode hinda zo yá mfeni, njap'ụ hinda 'yot'wa yá ntso'mi, ne da mpumbabi.

4.13 Ne bi 'ñembabi'ụ:

—Ha hingi pöhu tema di bonga nunar 'bedenü. Hanja ma gi pöhu tema di bonga gatho nuya 'bede 'mü.

4.14 Nunar mot'i, gehnu nö'ö togo xanga ár mhö Jö.

4.15 Nö'ö te 'bot'i bi zo har 'ñu, njangu nu'ụ togo xi nsipa ár mhö Jö. Ne xta wadi da 'yode, ngut'a da 'ñep'ụ ar ts'ondöhi, ne da hñömba nunar mhö xki zomhö ár müi.

4.16 Njap'utho nö'ö bi 'bot'a ha ya do, nú'mü xta nsipa ar mhö, njohya da hñöni.

4.17 Ha hinxi nunga yá 'yü, jange ngut'a da 'yot'i nu xta 'ñepabi ya thogi ne ya nt'utsa ngetho temba ár mhö Jö, dama da 'wege.

4.18 Ha nö'ö bi 'bot'a habu mi ja ya 'mini, ñhëhwi nu'ụ togo xi 'yo ár mhö Jö,

4.19 ne tupár müi gatho nö'ö te jawa har ximhai. Ne ñhëgi da ka ar bojö ne gatho nu ma'ra te hyoke, ne da hwata ar mhö xki zo hár müi, njangu ar t'ei hinte bi uni.

4.20 Ha nu ma'ra bi zo habu mar ñho ar hai. Ge'ụ togo xi 'yo ár mhö Jö, ne da hñöni xiñho, njangutho nu'ụ bi unga ar hoga sofo, 'ra n'atema'ret'a, ma'ra hñun'ate, ne ma'ra n'anthebe n'a ngu n'ar 'bai.

Gatho nö'ö t'ot'a n'öntho, n'ar pa ma da födi

(Lk. 8:16-18)

4.21 Ar Hesu bi 'ñembabi'u n'ehe:

—Hage da thö n'ar ñot'i ne da jo'ma ha n'ar hwada, wa da 'bö hai n'ar fidi. Hage hinda t'exa har mfox'yo.

4.22 Njap'utho n'ehe, gatho nö'ö t'ot'a n'öntho, n'ar pa ma da födi, ne ma da boxa gatho nö'ö xi jo'mi.

4.23 Nö'ö togo tu ár gu, dá 'yoxa nö'ö di mö.

4.24 Ne bi 'ñembabi n'ehe:

—Hyanthu xiñho tema gi ohu, ngetho nu'mu gi kwathu xiñho nö'ö nsi'ahu, ma da thus'ahu ár nzeye.

4.25 Ngetho nö'ö togo pets'i, ma da thu'spabi ár nzeye, ha nö'ö hinte pets'i, da thömba nö'ö beni mi peshmö.

Ar 'bede hanja te ar 'bot'i

4.26 Ar Hesu bi 'ñembabi n'ehe:

—Ár ts'ut'wi Jö ñhewi ngu n'ar n'oho pont'ei har hai.

4.27 Da ñöhö ne da nangi, parxui pots'e ne te, mödi hingi pödi hanja.

4.28 Ngetho nunár ñhose ar hai unga ar sofo: m'et'o ar donitho, m'efa da ngöhö, ne nuya ngöhö da ñuxa ya t'ei.

4.29 Ne nu xta ñöts'i, ngut'a da mfota ar t'exu, ngetho xi zo ar sofo.

Ár 'bede ar ndamurtasa bi 'bot'i

(Mt. 13:31-32; Lk. 13:18-19)

4.30 Bi 'ñembabi n'ehe:

—Tema ga emfu di hñöxa ár ts'ut'wi Jö, wa tema 'bede ga hejwu.

4.31 Ñhewi n'ar ndamurtasa, nu'mu xta 'bot'i xa tsi t'ulo, töta gatho nu ma'ra.

4.32 Ha nu xta te, töpa ár döta ma'ra ya k'ani. Ne xa di döta yá 'ye, nuya ts'int's'u hokyá m'afi ha yá xudi.

Teme mi japa ar Hesu ya 'bede

(Mt. 13:34-35)

4.33 Ar Hesu mi mönga nzeye ya 'bede nguyu. Njap'u mi utwa ya jö'i ár mhö Jö, njangu mi tsa nda zo yá mfeni'u.

4.34 Nu'mu himar 'bede, hinte mi xipabi'u, mödi yá maxte mi ot'wa ar 'ñu tema ndi boni, nú'mu mi 'buse'u.

Ar Hesu bi japa ar 'yomndöhi bi ntsaya

(Mt. 8:23-27; Lk. 8:22-25)

4.35 Nor pa'ö mi nxui, bi 'ñemba yá maxte:

—Ma ga thohu 'randi.

4.36 Bi 'ñe ya jö'i, ne har motsa habu mi ku'u, bi ma'u. Mi 'buhnu ma'ra ya motsa n'ehe.

4.37 Nú'mu mi ku har dehe, bi n'ö n'ar 'yomndöhi, ne xa mi ensa ar dehe har motsa, 'butho nda ku'mi.

4.38 Ne ar Hesu mi 'benga hár xutha ar motsa mi öhö, xki gaxa ár nö ha n'ar huhni. Bi ma ba t'a, ne bi t'embabi:

—Utate, ha hingi handi ma ga kuhu.

4.39 Ne bi nank'ö bi zu ar ndöhi, ne bi 'ñemba ar ñhontho:

—Ñhe, ntsaya.

Ne bi ntsaya ar ndöhi, ne gatho bi ñhetho.

4.40 Ar Hesu bi 'ñemba yá maxte:

—Yo'ö xa gi ntsuhü. Hanja hingi ñ'emuihü.

4.41 Nu'mú xa bi zu n'ar mbidi, ne mi enga n'a ngu n'a'u:

—Togo'munü. Ar ndöhi ne ar ñhontho ote te 'bepabi.

Ar ñ'ohö me Gadara xki nthexkwi ya ts'ondöhi

(Mt. 8:28-34; Lk. 8:26-39)

5.1 Bi 'rañ'u 'randi ar ñhontho, bi zoñ'u ha yá hai ya me Gadara.

5.2 Ne nu mi gö ar Hesu har motsa, dama ba e bi zu n'ar ñ'ohö xki 'ñe ha ya t'agi, mi nthexkwi n'ar ts'ondöhi.

5.3 Nunar ñ'ohonü mi 'bü ha ya t'agi, ne hinto mi tsá nda xot'e, himi ota ya nthöhöbö.

5.4 Ngetho hinga n'agitho xki nthöt'a ya nthöhöbö, ne nö'ö mi xeki ne mi kunt'a ya bojö, hinto mi tsá nda döhö.

5.5 Ne hyax'mü, parxui mi 'yo mi hexya mhafi ha ya t'ohö ne ha ya t'agi, ne mi ju ya do xa mi ntsense.

5.6 Nu mi hyanda ar Hesu mi e yap'u, bi nixt'i ba e bi ndandihmö hár wa.

5.7 Ne mi mafi nts'edi mi enö:

—Te gi hongwa Hesu, ár T'u'i Jö bi 'bü mhets'i. Di et'a Jö, di a'i hingi 'raka ar mfei.

5.8 Ngetho ar Hesu mi embabi:

—Ts'ondöhi, hye nunar ñ'ohonü.

5.9 Ne bi 'yambabi:

—Temar hu'i.

Ne bi dödi bi 'ñenö:

—N'a mut'i, ngetho di nzeyehe.

5.10 Ne xa mi apa ar möte, hinga nda mehni nda ma ma'ra ya hai'u.

5.11 Get'unü mi 'yonü nzeye ya ts'udi mi ñunga har ngwani.

5.12 Gatho nuya ts'ondöhi mi apa ar möte ar Hesu mi embabi:

—Penkagihe ma ga kuthe ha ya ts'udiyü.

5.13 Ne ar Hesu bi umba ar seki. Nuya ts'ondöhi bi boni bi ma ba kut'a ha ya ts'udi. Nuyü mi tsu ngu n'atenthebe, ne gatho bi ñhó har ma'ye, ma ba tso har ñhontho, bi jöt'a gatho.

5.14 Ne nu'u togo mi su ya ts'udi, bi nixt'i ma ba xipa ya jö'i mi 'bü har hnini ne har nthet'i. Ne bi bong'a ya jö'i, ma ba handa te xki thohnü.

5.15 Ba e bi k'onga ar Hesu'u, ne bi hyant'u mi 'buhwinü nö'ö togo xki nthexkwi ár mut'i ya ts'ondöhi, mi huhnü xki hye ár dutu ne mi ja ár mfeni. Nu'mú, xa bi zu'u.

5.16 Ne nuya togo mi 'buhnü, ne bi hyanda tema xki ja nö'ö togo mi pe'sa ya ts'ondöhi ne ya ts'udi, mi petwa nu ma'ra.

5.17 Ne nuya jö'i bi ndüi bi 'yapa ar möte ar Hesu nda manü nda zokwabinü yá hai.

5.18 Ne mi boxa ar Hesu har motsa, nö'ö ar ñ'ohö xki nthexkwi hmö ya ts'ondöhi, mi apa ar möte nda hyegi nda mewi.

5.19 Nö'ö himbi hyegi, ne bi 'ñembabi:

—Di ma ri ngu ne ba tsü ri mēni. Petwabi hangü ya döta nt'udi xi 'yot'a ar tsi Hmu, ne hanja xi mes'a ar nhwēki.

5.20 Ne bi ma, bi ndüi bi metwanü Ndekapoli tengü ár döta ya nt'udi xki hwēkwa ar Hesu, ne gatho xa mi 'yotho.

Ár t'inxu ar Hairo, ne ar 'behñö bi damba ár pat'i ar Hesu

(Mt. 9:18-26; Lk. 8:40-56)

- 5.21 Bi 'raxa man'agi ar Hesu 'randi ar ñhonthē ha n'ar motsa. Bi wat'a ra nzeyē ya jō'i, ne nö'ö mi 'bata har ñonthē.
- 5.22 Ne ba e n'ar ndö ha yá nijö ya xodyo mar thuhu ar Hairo, mi hyandi bi ndandihmō hár wa.
- 5.23 Ne xa mi apa ar möte mi embabi:
—Ma t'inxu ntsawi ar ndöte. Ba e gi hñuxa ri 'yē gi othe ne da nte.
- 5.24 Bi mēwi 'mū. Ra nzeyē ya jō'i mi tēni, ne nuyū xa mi ts'its'i.
- 5.25 Ja mi panū n'ar 'behñö mi pe'sa 'ret'a ma yonjeyē mi xot'wa ya ji.
- 5.26 Xa mi ñ'uda ár m'ui. Xki k'önga nzeyē ya unga ñ'ethi, xki de gatho nö'ö mi pets'i ne hinte mañho xki dini, hōnse mi tsā'yē hyax'mū.
- 5.27 Nu mi 'yode mi nhōnga ar Hesu, bi yut'a mameda ya jō'i, ne ba e hár xūtha bi damba ár pat'i.
- 5.28 Ngetho mi ense: Nu'mū mödi hōnse ga thambahmō ár pat'i, da dixkagi.
- 5.29 Ne n'agitho bi k'ū nuya ji, ne bi zā hár ndo'yo xki hñöka nunar ugi'ö.
- 5.30 Ar Hesu dama bi zā xki bōnga ar ts'edi hár ndo'yo, bi ñēgi bi hyanda ya jō'i, ne bi 'ñembabi:
—Togo xi damga ma he.
- 5.31 Nuyá mǎxte bi 'ñembabi:
—Gi handi ts'is'a gatho ya jō'i, ne gi enö: Togo xi ñañ'a'i.
- 5.32 Ha nö'ö mi handa hár nthet'i mi honi togo xki 'yot'a njap'ū.
- 5.33 Nu'mū nunar 'behñö, mi ntsu ne xa mi nhwöt'i, mi pö'ö tema xki mēfi, ba e bi ndandihmō hár wa'ö, ne bi datwa majöni.
- 5.34 Ha nö'ö bi 'ñembabi:
—Ma tsi t'inxu, nuna ri jamfi xi mǎx'i xi dix'i. Di ma ter entho, xi hñöka ri ugi.
- 5.35 Hinxki watho nda ñö, ba e 'ra xki 'ñe hár ngu ár ndö yá nijö ya xodyo, ne bi 'ñembabi:
—Yo gi hōkwa ár 'befi ar Utate. Xi du ri t'inxu.
- 5.36 Mi 'yö ar Hesu, bi 'ñemba ár ndö ar nijö:
—Yo gi ntsu. Hōnse ñ'emui.
- 5.37 Ne hinto bi hyēgi nda ñeni, hōnse ar Pedro, ar Hakobo ne ar Xuwa ár jödöp'ū'ö.
- 5.38 Ne bi ma hár ngu ar ndö'ö, ne bi hyanda ya jō'i xa mi nxint'i mi zoni ne mi mafi.
- 5.39 Ne nu mi yut'i, bi 'ñembabi'ū:
—Yo'ö xa gi nxinthū ne xa gi zoñhū. Nunar nxutsinū hinxi du, ötho.
- 5.40 Ha nu'ū togo mi 'buhñū mi thenthō. Nunū bi 'yēnga gatho, ne hōnse bi hyēgi nda yut'a habū mi 'bēngar nxutsi ár dada, ár nōnō ne nu'ū mi ñ'owi.
- 5.41 Bi mipa ár 'yē ar nxutsi, ne bi 'ñembabi:
—Talita kumi —di bōni da 'ñenö: Nu'ge nxutsi, di xi'a'i gi nangi.
- 5.42 Ne dama bi nangi bi ñ'o. Nunar nxutsinū mi pe'sa 'ret'a ma yonjeyē. Ne gatho nu'ū bi hyandi, xa bi 'yotho.
- 5.43 Ar Hesu xa bi hñu'mba yá mui, hinto nda metwabi nö'ö xki thogi, ne nda t'umba te nda zi ar nxutsi.

Ar Hesu mi 'buhñū Nasare

(Mt. 13:53-58; Lk. 4:16-30)

- 6.1 Ar Hesu ba ponū bi ma ár hai, ne nuyá mǎxte mi tēni.
- 6.2 Mi zō ar pa ntsaya, bi ndui bi uta ya jō'i ha yá nijö. Ne nzeyē mi 'yode, xa bi 'yotho, ne mi eñ'ū:
—Ha xpa pōhñū gatho nö'ö mö. Tema mfödi xi t'umbabinū. Hanja ot'a gatho nuya döta nt'udiyū.
- 6.3 Ha hinga gehñū ar hyenza, ár t'ū ar Maria, ár jödö ar Hakobo, ar Huse, ar Huda ne ar Simu n'ehe. Ha hindi 'buhwihūwa yá nju.
Ne xa mi tsot'a yá mui.
- 6.4 Ha nunar Hesu mi embabi'ū:

—N'ár m'ehni Jö habu gatho nhumansu, ha nu hár haise hin'ö, ne hingi numansu yá mäni, ne hár nguse.

6.5 Ne himbi tsa bi 'yot'a nzeze ya döta nt'udinü, honse bi othe 'ra ya dathi mi hñu'spa ár 'yeyü.

6.6 Ne xa mi 'yotho hanja himi n'emüi'u. Ne mi 'yo ha ya t'ulo hnini har nhet'i, mi uta ya jö'i.

Bi 'behna nu'u 'ret'amayoho yá maxte

(Mt. 10:5-15; Lk. 9:1-6)

6.7 M'efa ar Hesu bi zohna nu'u 'ret'amayoho yá maxte, ne 'rama yoho bi mehni nda ma'u, ne bi umba ar ts'edi nda 'yenga ya ts'ondöhi.

6.8 Ne bi xipabi hinte nda hñöxa nda n'o har 'ñu. Hinte nda hñöxa ar 'rozö, wa te nda zi. Hinge nda nxö'sa ar bojö ha yá ngut'i, honse n'ar ndoho nda hñöts'i.

6.9 Nda dit'a yá thiza, ne hinge nda hñöxa yomponi ar dutu.

6.10 Ne bi 'ñembabi'u:

—Nú'mü xki kuthu ha n'ar ngu, ka gi oxunu gatho ya pa gi 'buhunu har hnini'ö.

6.11 Nu habu hinda t'a'ahu ar seki, ne hinda ne da 'yox'ahu, poñhunu ne hwöju ar fonthai xi wat'a ha ri wahu. Njap'u da bö'u hingi ho nö'ö te pe'u. Xa majöni di xi'ahu, nunar pa ma da thö'spa majöni nö'ö ar hnini'ö, ma da hñonga n'ar döta mfei, di töpa yá mfei ya hnini Sodoma ne Gomora.

6.12 Ne mi boñ'u mi xipa ya jö'i nda 'yot'wa yá ntso'mi.

6.13 Mi enga nzeze ya ts'ondöhi, mi koxa ar nziki nzeze ya dathi, ne mi othe'u.

Bi tho ar Xuwa Xixthe

(Mt. 14:1-12; Lk. 9:7-9)

6.14 Ar ndö Erode bi zo ár gu gatho nö'ö mi ot'a ar Hesu, ngetho xki nunga ár thuhu gatho nuya hai'u. Ne mi enö:

—Ar Xuwa Xixthe xi mengi xi nte zëi, jange pe'sa nor ts'edi'ö.

6.15 Ha ma'ra mi enö mar Elia. Ne ma'ra mi enö már m'ehni Jö, ngu nu ma'ra ya m'ehni mi 'bu mam'et'o.

6.16 Nu mi 'yo njap'u ar Erode bi 'ñenö:

—Gehnu ar Xuwa togo da hekwa ár 'yuga xi mengi xi nte.

6.17 Ngetho gese ar Erode xki mehna togo nda gu ar Xuwa, xki dot'a ya bojö har fadi. Xki jap'u ngetho xki hñökwahmö hinge nda m'uhwi ar Erodia, ár 'behñö ar Lipe ár jödöp'u'ö, xki zimbabi ne mi 'buhwi.

6.18 Ngetho ar Xuwa xki 'ñemba ar Erode:

—Hingi ho gi 'buhwi ár 'behñö ri jödö.

6.19 Ha nunar Erodia mi öthó, mi ne nda hyohmö, ha himi tsa.

6.20 Ngetho nunar Erode mi tsu ar Xuwa, mi pödi mar hogajö'i ne hinte ma ts'oki mi tu, jange mi fats'i nda k'ont'i. Ne nú'mü mi oxa nö'ö mi mön'ö, himi pödi te nda beni, ne mi johya mi ots'e.

6.21 Ha n'agi bi zo ar pa mi to'ma ar Erodia. Nú'mü mi da ár dango ar Erode, mi umba n'ar t'oxi yá maxte mi ndöwi, ya ndöndogu ne ya ndöngi me Ngalilea.

6.22 N'a mbi yut'atho ár t'inxu ar Erodia bi nei, ne bi numañho ar Erode ne gatho nu'u mi huhwi har mexa. N'a mbi 'ñembatho nunar nxutsi:

—Yaka gatho nö'ö gi ne, ne ga 'ra'i.

6.23 Bi 'ñet'a made Jö bi 'ñembabi:

—Gatho nö'ö gi 'yakagi, ga 'ra'i. Di 'bui ga 'ra'a made ma ts'ut'wi di pets'i.

6.24 Mi bonga nunar nxutsi, bi 'ñemba ár nönö:

—Te ga apa ar ndö.

Ne nunár nönö bi 'ñembabi:

—Yapa da 'ra'a ár nönö ar Xuwa Xixthe.

6.25 Nu'mú dama bi yut'a habu mi 'bu ar ndö, ne bi 'ya njawa:

—Di ne gi 'raka n'agitho ha n'ar manza ár nō ar Xuwa Xixthe.

6.26 Ne nunar ndö Erode xa bi zot'a ár mui. Ne himbi tsā bi ponga ár ne, ngetho xki 'ñet'a made Jö, ne xki 'yoxa gatho nu'u mi huhwinu har mexa.

6.27 Jange n'agitho bi mehna n'ar ndogu nda hōmpa ár nō ar Xuwa.

6.28 Ar ndogu bi ma ba hekwa ár nō har fadi, ne ba hōmpabi mi o ha n'ar dōta manza. Ne bi datwa ar nxutsi, ha nuna bi thokwa ár nōnō.

6.29 Nu mi 'yo yá maxte ar Xuwa tema xki thogi, ba e'u ne bi hñō'spa ár ndo'yo ma ba agi.

Bi t'inga ngudminthebe ya jö'i

(Mt. 14:13-21; Lk. 9:10-17; Jn. 6:1-14)

6.30 Nú'mu ba penga yá maxte ar Hesu, bi ma ba tsu'ö, ne bi metwabi gatho nö'ö xki me'u ne nö'ö xki utwa ya jö'i.

6.31 Ha nö'ö bi 'ñembabi:

—Möhö har t'oho gi tsayahu n'a tsi tui habu hinto 'bui.

Xa nzeye ya jö'i ndi ma ne ndi 'ñehe, himi hegi nda ñuni.

6.32 Ne bi mase'u ha n'ar motsa, ndi ma habu hinto mi 'bui.

6.33 Ha nzeye ya jö'i bi hyandi mi ma'u, ne bi bödi go mi ge'ö. Ba poñ'u ha ya hnini bi ma watho, ne bi döhö bi zoñ'u m'et'o habu ndi ma'u.

6.34 Ne nu mi gö ar Hesu har motsa, bi hyandi xa mi nzeye. Ne xa bi hwēki, ngetho mi ñehwi 'ra ya tsi deti hinte 'ñe ár ma'yo, ne bi mudi te gatho mi uti.

6.35 Nú'mu mi nde, bi wat'a yá maxte ne bi 'ñembabi:

—Hinte jawa ya ngu har t'oho, ha bi nde.

6.36 'Ñedi ma da hyonga te da ziyu har nthet'i ne ya t'ulo hnini, ngetho hinte höyu.

6.37 Ar Hesu bi dödi ne bi 'ñembabi:

—Go gi umfu te da zi.

Bi dö'u:

—Habu ga tiñhe yonthebe mpa ar nthöhö ga tañhe ya thuhme, ne ga 'wiñheyu.

6.38 Nö'ö bi 'ñembabi'u:

—Hangu ya thuhme gi höhu. Dí ma ba nuhu.

Ne mi bödi bi 'ñeñ'u:

—Kut'a, ne yoho ya tsi hwö.

6.39 Bi möñ'ö nda nsipabi ya jö'i nda hñudi mut'itho har k'angdoni.

6.40 Ne bi hñu'u bi 'yot'a ya mut'i nthebe, ne ma'ra ngudmi.

6.41 Nu'mú ar Hesu bi gu nuya kut'a ya thuhme ne nuya yoho ya hwö, bi no'sa mhets'i bi jöpi. Bi heka ya thuhme, ne bi thokwa yá maxte bi hyemba ya jö'i. Ne bi jap'u nuya yoho ya hwö n'ehe.

6.42 Gatho ya jö'i bi ñuni ne xa bi niñö.

6.43 M'efa bi njo nuya xeni thuhme ne ya hwö bi bongi, bi ñhu'sa 'ret'amayoho ya 'bots'e.

6.44 Ha nu'u togo xki ñuni, mi tsu ngu ngudminthebe ya ñ'oho.

Ar Hesu mi 'yoda mañö ar dehe

(Mt. 14:22-27; Jn. 6:15-21)

6.45 M'efa ar Hesu bi xipa yá maxte nda boxa har motsa, nda m'et'o ndi ma'u Betsaida, mi 'bu 'randi har ngwani. Ha nö'ö nda gohmö nda ñ'ehwi ya jö'i.

6.46 Ne mi wadi bi 'ñe'u, bi boxa har t'oho ma ba apa Jö.

6.47 Nu mi nxui, ar motsa mi pa mateda ar ñhontho, ne nö'ö mi 'buse har t'oho.

6.48 Mi hyanda yá maxte xa mar ñhembabi nda ñ'o har dehe, ngetho ar ndöhi mi ntoxkwi'u. Mi zo ngu ar

hñumxudi, bi ma ba tsudi mi 'yoda mañö ar dehe, ne bi 'yot'e ngu mi ne nda thotho.

6.49 Mi hyant'u mi 'yo har dehe, bi beñ'u mar pite, ne xa bi ma'u.

6.50 Gatho bi hyandi ne xa bi ntsu. N'agitho bi zofo ne bi 'ñembabi:

—Go gekaga, yo gi ntsuhu.

6.51 Ne bi boxkwi'u har motsa. Nu'mú bi nköt'a ar ndöhi, ne nu'u xa bi 'yotho, himi pödi te nda beni.

6.52 Ngetho hinxki zoda yá mfeni nú'mú mi japa ya thuhme bi xu, xa mar me yá mfeni.

Ar Hesu bi othe ya dathi núnu Genesare

(Mt. 14:34-36)

6.53 Mi zöñ'u 'randi ar dehe har hai Genesare, ka bi dötnu ar motsa.

6.54 Ne nu mi gö'u, n'agitho bi bö ya jö'i go mar Hesu.

6.55 Bi ne ya nguyu xoge har nthet'i nor hai'ö, ne bi ndui habu gatho mi ts'impa ya dathi mi kuxa ha ya fidi, habu nda nt'ode mi 'bu'ö.

6.56 Ne habu gatho mi kut'a ar Hesu ha ya t'ulo hnini, ha ya döhani ne ha xki font'a ya ngu, mi ts'i ya dathi ne nda 'bö ha ya dö'ñu. Ne nuyu honse mi adi nda thegi nda damba ár nöni ár pat'i, ne gatho nu'u mi thambabi, mi thits'i.

Nö'ö japi da ts'okar jö'i

(Mt. 15:1-20)

7.1 Nuya denga'bepate ne 'ra ya böt'ofu xki 'ñe Herusalen, ba e bi wat'a habu mi 'bu ar Hesu.

7.2 Ne mi hyant'u 'ra yá maxte ar Hesu hinge mi xuy'e nda ñuni, ne mi theñ'u.

7.3 Ngetho nuya denga'bepate ne gatho ya xodyo xa mi tenga nunar nt'umbi xki zokwa yá pale, hinge nda ñuni nu'mú hinge nda nxu'y'e xiñho.

7.4 Ne nú'mú nda menga har tai, m'et'o nda nxu'y'e, ne ja nda ñuni. Hinge honseñu, bi gu ma'ra ya nt'umbi nda mefi, ngu ar sut'at'eni, ar sut'bada, ar sut'at'enibojö, ne nda menga yá fidi.

7.5 Bi 'yambabi 'mú ya denga'bepate ne ya böt'ofu:

—Yo'ö ri maxte hingi temba yá nt'umbi ma palehu, ñuni hingi nxu'y'e m'et'o.

7.6 Ar Hesu bi dötwabi'u ne bi 'ñembabi:

—Xa gar nemhñöhü. Majöni nö'ö bi 'yemp'ahü ar m'ehni Isaia xi t'ot'i njawa:

Nunar hnininu oxta mañö eñ'u eska ma nsu,

ngetho himbi ponga ha yá müi.

7.7 Ter ñho'ö eska ma nsu,

embabi ar hoga nt'uti nö'ö xi bense'u.

7.8 Ngetho xka hyehu ár 'bepate Jö, ne xa gi ne gi temfu yá nt'umbi ya meximhai, ngu ar nsut'at'eni, ar nsut'bada, ne gatho nu ma'ra gi pehu njap'utho.

7.9 Mi embabi'u n'ehe:

—Hinte gi nuthu ár 'bepate Jö, gi teñhu nuya ri nt'umbihu.

7.10 Ngetho ar Moise bi 'ñenö: 'Ñe'spa ár nsu ri dada ne ri nönö. Ne enö: Nö'ö togo da zanga ár dada wa ár nönö, hinda k'ont'i da tho.

7.11 Ha nu'ahü gi eñhu xiñho togo da 'ñemba ár dada wa ár nönö: Hingi tsa ga fax'i, ngetho nö'ö nga 'ra'ahmö, gehnu ar Korban (poni da 'ñenö ár m'öñho Jö).

7.12 Ne njap'u hingi hehu da maxa ár dada ne ár nönö.

7.13 Hinte gi nuthu ár mhö Jö, gi hokse ri nt'umbihu, ne nzeye ma'ra ya 'befi nguyu gi othu.

7.14 Ne bi zo gatho nu'u mi 'buhnu, bi 'ñembabi'u:

—Gi gathohu, 'yohu ne dá zo ri guhu nö'ö ma ga xi'ahü.

7.15 Hiñ'otho te da yut'a hár müi ar jö'i ne da ts'okwabi. Nö'ö bi ponga mbo hö, go ts'ok'ö.

7.16 Nö'ö togo tu ár gu da 'yode, dá 'yoxa nö'ö te di mö.

7.17 Nú'mu mi zop'u ya jö'i, bi yut'a har ngu, nuyá maxte bi 'yambabi tema ndi bonga nö'ö xki mö.

7.18 Ne ar Hesu bi 'ñembabi'u:

—Hage nu'ahu n'ehe hinte xi zo ri mfenihu. Ha hinxka pöhu gatho nö'ö kut'a hár ne ar jö'i, hingi tsa da ts'oki.

7.19 Ngetho hingi tsinga hár mfeni, honse tho hár mu, ne da 'yei xta n'exjo.

Bi mö njap'u, ne mi n'udi gatho ya nhuni xint'axi.

7.20 Ne mi enö:

—Gatho nö'ö ponga hár mfeni, nö'ö hö, japi da ts'oka ar jö'i.

7.21 Ngetho ka bi ehnu ya ts'omfeni, ya ts'inga nthöti, ya m'engwi jö'i, ar ntho,

7.22 ar mfë, ar nhem'ets'i, ya ts'om'ui, ar nhemhö, ar nhe'behhö, ar hyoke, ne da 'yomba ar 'bede ma'ra, ar n'ets'i, ne ar k'at'amfeni.

7.23 Gatho nuya ts'okiyu, di bonga mbo, ne ts'oka ya jö'i.

Ár jamfi ar 'behhö mar mengu man'ar hai

(Mt. 15:21-28)

7.24 Bi nangunu bi ma har hai Tiro ne Sidon. Mi zoni bi yut'a ha n'ar ngu, hinto mi ne nda bödi mi 'buhnu, honse himbi tsa bi n'öni.

7.25 Ngut'a bi zo ár gu n'ar 'behhö mi 'ne n'ar t'inxu xki nthexkwi n'ar ts'ondöhi. Mi bödi mi 'buhnu, dama ba e bi ndandihmö hár wa.

7.26 Nunar 'behhönu himar me Israel, xki m'u har hai Sirofenisia. Ne mi apa ar möte ar Hesu nda 'yemba ar ts'ondöhi ár t'inxu.

7.27 Har Hesu bi 'ñembabi:

—Tö'ma m'et'o da niñö ya bötsi, ngetho hingi ho da gumpa yá thuhme tsi'u, ne da t'emba ya 'yo.

7.28 Nunar 'behhö bi dödi ne bi 'nenö:

—Hö tsi Hmu, mödi njap'u, nuya 'yo tsipa yá bone ya bötsi ta har mexa.

7.29 Nu'mu ar Hesu bi 'ñembabi:

—Ngetho xka mönga nunar mhönu, di ma. Ar ts'ondöhi xi hyek'a ri t'inxu.

7.30 Ne nu mi zonga ár ngu, bi dinga ár t'inxu mi 'benga har fidi, xki hye ar ts'ondöhi.

Ar Hesu bi othe n'ar gogu mar köne

7.31 Bi bonga ar Hesu har hai Tiro, bi thota har hai Sidon, ndi ma har nhonthe Ngalilea, bi 'raxt'a ar hai Dekapoli.

7.32 Ne ba ts'impanu n'ar n'ohö mi gogu ne mar köne, bi t'apa ar möte nda hñu'spa ár 'ye.

7.33 Nö'ö bi 'wekase, ne bi dint'wa yá xa ha yá gu'ö. Bi zoxa ár 'ye ne bi damba ár jöhne.

7.34 Bi guxa ár da mhets'i, bi ngöts'i ne bi 'ñembabi:

—Efata —ne da 'nenö: Dá xogi.

7.35 Ne dama bi xo ár gu, ne bi tuka ár jöhne, bi nö xiñho.

7.36 Ar Hesu bi hñu'mba yá mu hinto nda xipabi'u. Ha nú'mu mi xipabi'u hinte nda mö, xa mi pe'u.

7.37 Ne xa mi 'yö'u ne mi eñ'u:

—Gatho nö'ö pefi, ot'e xiñho: nuya gogu xokwa yá gu, ha nuya gone japi da nö.

Bi t'inga ngu yon'atenthebe ya jö'i

(Mt. 15:32-39)

8.1 Nuya pa'u xki wat'a ra nzeze ya jö'i man'agi, ne hinte mi pe'sa te nda zi. Ar Hesu bi zohna yá maxte ne bi 'ñembabi:

8.2 —Di hwëka nuya jö'i, ngetho pe'sa hñupa di n'ohu, ne hinte hö te da ziyu.

8.3 Ha nu'mu ga pehna yá ngu hinte xi zi, yo ma da went'a har 'ñu, 'ra xpa e yap'u.

8.4 Nuyá maxte bi 'ñembabi:

—Ha di 'ñe gatho ar thuhme da japa da niñöwa har ot'at'oho nuya jö'iyu.

8.5 Ha nö'ö bi 'yambabi'u:

—Hangu ya thuhme gi pe'su.

Ne bi 'ñeñ'u:

—Yoto.

8.6 Ar Hesu bi 'bepa ya jö'i nda hñu har hai 'mu. Bi guxa nuya yoto ya thuhme, bi umba njamödi Jö. Bi heke ne bi hyemba yá maxte, ha nuyá maxte bi mokwa ya jö'i.

8.7 Mi pes'u n'ehe 'ra ya tsi hwö. Bi jöp'ö n'ehe, ne bi mehna nda m'okwa ya jö'i.

8.8 Bi ñuñ'u ne xa bi niñö. Bi njo nuya xeni xki bongi, ne bi ñuxa yoto m'ots'e.

8.9 Mi tsu ngu yon'atenthebe nu'u bi ñuni, ne ar Hesu bi 'ñedi bi mehni bi ma'u.

8.10 M'efa bi boxkwi yá maxte har motsa, ne bi ma'u har hai Dalmanuta.

Ar t'a nt'udi

(Mt. 16:1-4; Lk. 12:54-56)

8.11 Ba e 'mu ya denga'bepate nda ntsahñökiwi, ne mi apa nda uta n'ar nt'udi ndi 'ñe mhets'i, ne njap'u nda tsati.

8.12 Ar Hesu bi 'yents'a n'ar ngöts'i dumui, ne bi 'ñenö:

—Yo'ö a ya nt'udi nuya ts'ojö'i 'bupya. Xa majöni di xi'ahu, hinda ma da t'umbabi.

8.13 Bi zop'u'u, ne bi mengi bi yut'a har motsa, bi 'raxa 'randi ar ngwani.

Yá nt'uti ya denga'bepate

(Mt. 16:5-12)

8.14 Yá maxte bi pumhni nda hñöxa ya thuhme, ne honse n'a mi hö'u har motsa.

8.15 Har Hesu bi 'ñembabi'u:

—Zot'a ri dahü ne jamasubihü yá nt'usthuhme ya denga'bepate ne yá nt'usthuhme ar Erode.

8.16 Mi ñöxhnatho n'a ngu n'a mi eñ'u:

—Xikagihü njap'u ngetho hinda höhü ya thuhme.

8.17 Mi böta ar Hesu, bi 'ñembabi'u:

—Hage xa gi ñöxnathohü gi noñhü hinte gi pe'su ar thuhme. Wa hinxi xota ri mfenihü, ne xi meda ri ñöhü.

8.18 Ha hingi zo ri dahü, wa hingi xo ri guhü, ne xka pumhnihu.

8.19 Nú'mu nda hembra kut'a thuhme ngudminthebe ya jö'i, hangu m'ots'e ya xeni ga ñu'su.

Bi dö'u ne bi 'ñenö:

—'Ret'amayoho.

8.20 —Ne nú'mu nda hembra yoto thuhme yon'atenthebe ya jö'i, hangu m'ots'e ya xeni ga ñu'su n'ehe.

Ne bi 'ñeñ'u:

—Yoto.

8.21 Ar Hesu bi 'ñembabi'u 'mu:

—Hanja hinxi zoda ri mfenihü.

N'ar goda bi t'othe núnu Betsaida

8.22 M'efa ar Hesu ba e Betsaida, ne ka ba ts'impanu n'ar goda, ne mi t'apa ar möte nda hñu'spa ár 'ye.

8.23 Bi mipa ár 'ye ar goda 'mu, ne bi guka nthi ar hnini. Bi zospa ár da, bi hñu'spa ár 'ye, ne bi 'yambabi ha mi handa n'a tsi tui.

8.24 Nö'ö mi wadi bi hyandi bi 'ñenö:

—Di handa ya jö'i ñehwi ya za, 'yo.

8.25 Ne bi hñu'spa ár 'ye man'agi hár da, bi japi bi hyandi. Ne bi ho yá da, bi hyanda yap'u, ne bi hyanda gatho xiñho.

8.26 Ar Hesu bi mehna ár ngu, ne bi hñu'mba ár mui bi 'ñembabi:

—Yo ma gi kut'a har hnini.

Ar Pedro bi damajöni

(Mt. 16:13-20; Lk. 9:18-21)

8.27 Ar Hesu bi bongwi yá maxte, bi ma ha ya t'ulo hnini har hai Nsesarea Filipino. Ne nú'mu mi ne ar 'ñu, bi 'yambabi yá maxte:

—Togo engä ya jö'i go geke 'nö.

8.28 Bi dö'u njawa:

—'Ra enö gar Xuwa Xixthe, ma'ra gar m'ehni Elia, ha ma'ra enö go ge'e n'a nuya m'ehni mi 'bu mam'et'o.

8.29 Nu'mú nö'ö bi 'ñembabi:

—Xi'ahu, togo gi eñhu go gekaga.

Bi dö ar Pedro ne bi 'ñenö:

—Nu'ge go gar Kristo xi 'ñex'a Jö.

8.30 Ar Hesu bi 'ñembabi hinto nda xipabi'u.

Ar Hesu bi mö ma nda tho

(Mt. 16:21-28; Lk. 9:22-27)

8.31 Ne bi ndui bi uti mi mahyoni nda tho nzeye ya thogi Nö'ö Togo ba e bi Njö'i. Ne nda utsa ya dönziandö, ya ndömöjö ne ya böt'ofö. Nda tho, ne ár hñupa nda mengi nda nte man'agi.

8.32 Mi ot'wa ar 'ñu xiñho. Nu'mú ar Pedro bi guki ne bi ndui bi hñu'mba ár mui hinge nda jap'u.

8.33 Nunar Hesu bi ñhanda habu mi 'ba yá maxte, ne bi zu ar Pedro bi 'ñembabi:

—Di mawa, ts'ondöhi. Ngetho hingi temba ár mfeni Jö, gi tembatho yá mfeni ya meximhai.

8.34 Bi zohna ya jö'i ne yá maxte, bi 'ñembabi:

—Nö'ö togo ne da dengagi, mahyoni da pumhnise ár te, ne da ñ'ent'atho ga ñ'o'be.

8.35 Ngetho nö'ö togo ne da japi da k'ont'a ár te, ma da 'bedi. Ha nö'ö togo ent'i da unga ár te da dengagi ne da mönga ar hoga mhö, ma da dinga ar te hiñham'u da göts'i.

8.36 Ngetho tema ñho da gukwa n'ar jö'i, da dö gatho nö'ö te jawa har ximhai ne da 'be ár pa.

8.37 Tema tsä da unga n'ar jö'i da danga ár pa.

8.38 Ngetho nö'ö togo da ntsä da datka majöni ha yá nthandi nuya ts'ojö'i 'bu nuya payu, ne da ntsä da mömga ma mhö, Nö'ö Togo ba e bi Njö'i ma da ntsä n'ehe xta ehe di hömpa ár nsunda ár Dada, ne di ñ'owi ya hoga enxé.

9.1 Bi 'ñembabi n'ehe:

—Xa majöni di xi'ahu, gi 'buhüwa 'rapya, hingi ma gi tuhu, m'et'o ma gi hyanthwu ár ts'ut'wi Jö da ehe, xa di nheki ár ts'edi.

Bi mponga ár 'bai ar Hesu

(Mt. 17:1-13; Lk. 9:28-36)

9.2 Mi tho 'rato mpa ar Hesu bi zixa ar Pedro, ar Hakobo ne ar Xuwa, bi boxaseyu ha n'ar t'ohö mar ñhets'i. Mi zöñ'u bi mponga ár 'bai ar Hesu hár nthandi'u.

9.3 Ne ár he xa mi hyats'i, bi t'axki ngu ar tse. Hinjo'owa har ximhai n'ar meni da tsä da japi da t'axki njangu'ö.

9.4 N'a mbi hyandatho yá m̄axte mi 'bahnu ar Elia ne ar Moise mi ñöwi ar Hesu.

9.5 Nu'mú ar Pedro bi 'ñemba ar Hesu:

—Ma tsi Utate'i, xiñho ga 'buhwa. Te gi mö, ga hoje hñu ya m'et'e, n'a habu gi 'buke, n'a habu da m'u ar Moise, ne man'a habu da m'u ar Elia.

9.6 Ar Pedro mi mönga njap'u, ngetho himi pödi teme nda mö, xa xki zuyü.

9.7 N'a mba eta n'ar gui bi go'mtho, ne bi nhekinu n'ar mhö bi 'ñenö:

—Gehnu ma hmöka T'u. 'Yohu nö'ö xi'ahu.

9.8 M'efa mi mengi bi hyant'u man'agi, hõnse ar Hesu mi 'bahnu.

9.9 Ne mi gö'u har t'ohö, bi hñu'mba yá müi'u hinto nda xipabi nö'ö xki hyant'u, nda do'mi m'et'o nda mengi nda nte man'agi Nö'ö Togo ba e bi Njö'i.

9.10 Bi kwatatho'u nunar mhönu, ne mi ñö'u n'a ngu n'a teme ndi bongga nö'ö xki mö, nda mengi nda nte man'agi.

9.11 Ne bi 'yambabi'u ar Hesu:

—Yo'ö engä ya bö't'ofö, m'et'o ma da e ar Elia, ne ka da e ar Kristo.

9.12 Ar Hesu bi dödi ne bi 'ñembabi'u:

—Xa majöni ar Elia da e m'et'o, ne da 'ñexa xiñho man'agi gatho te jawa. Xi'mü, yo'ö xi t'ot'a har T'ofö, Nö'ö Togo ba e bi Njö'i ma da tho ya thogi, ne hinte ma da nhu.

9.13 Ha di xi'ahu, ar Elia ba ehe, ne bi 'yot'wabi gatho nö'ö mi ne ya jö'i, ngu xki t'ot'i nda tho'ö.

Ar Hesu bi othe n'ar bötsi xki nthexkwi n'ar ts'ondöhi

(Mt. 17:14-21; Lk. 9:37-43)

9.14 Nu mi zoñ'ö habu mi 'bu yá m̄axte, bi hyandi nzeye ya jö'i xa xki got'atho, ne mi ñöwi ya bö't'ofö.

9.15 Ne mi zo'ö, gatho ya jö'i xa bi 'yotho, bi nixt'i ma ba tsüdi ne bi zengwa.

9.16 Nö'ö bi 'yambabi:

—Tema gi ñöwihü.

9.17 Bi dö n'a mi 'bu har mut'i, ne bi 'ñenö:

—Tsi Utate, da tsin'a ma t'u nthexkwi n'ar ts'ondöhi japi da ngone.

9.18 Habu gatho da züdi xa hwöts'i, ne japi da 'yents'a ya fugi hár ne, xa guxt'a yá ts'i, ne 'ramtx'u di 'yot'i. Da xipa nuya ri m̄axte nda 'yemhö, ne hinte bi japabi.

9.19 Bi dö'ö ne bi 'ñenö:

—Yá bötsi'ihü ya me'sku. Hangu ma ga 'buhwithohü ne ga pes'ahu ar ts'eti. Ba tsinjuwa ar metsi.

9.20 Ne ba ts'impabi. Ha nunar ts'ondöhi mi hyanda ar Hesu, xa bi hwö'sa ar bötsi, mi zo har hai xa mi ntöni, ne xa mi ents'a ya fugi hár ne.

9.21 Ar Hesu bi 'yamba ár dada:

—Hangu pets'i njanu.

Ar dada bi dödi ne bi 'ñenö:

—Bi dü'mbabi mi t'ulotho.

9.22 N'andi ent'a har tsibi ne har dehe, ne da hyohmö. Ha nu'mü da tsä te gi japi, pe'skagihe ar nhwëki ne faxkagihe.

9.23 Ar Hesu bi 'ñembabi:

—Nu'mü da tsä gi ñ'emüi hö, ngetho nö'ö togo ñ'emüi, hinter ñhembibi.

9.24 Ne n'agitho ár dada ar bötsi bi ñö nts'edi ne bi 'ñenö:

—Di ñ'emüi. Faxkagi da hñuxa ma ñ'emüi.

9.25 Nu mi hyanda ar Hesu ya jö'i mi ntuts'i mi kwat'i, bi zü ar ts'ondöhi ne bi 'ñembabi:

—Ts'ondöhi gone ne gogu, di 'bep'a'i gi hyehnu, ne hingi pengi gi kut'a man'agi.

9.26 Nu'mü ar ts'ondöhi xa bi hyexa ar mhafi, ne xa bi nhwöste bi boni. Ne nunar bötsi bi gohnu wande xki du, jange nzeye mi enö:

—Xi du.

9.27 Ha nunar Hesu bi mipa ár 'ye bi 'ñei, ne bi nangi.

9.28 Nu mi yut'ö har ngu, yá maxte bi 'yambase:

—Yo'ö himbi tsa da eñhe.

9.29 Har Hesu bi 'ñembabi:

—Nuya ts'ondöhiyu xi ñhembabi da boni, mahyoni ar nt'apa Jö ne ar bēhē.

Ar Hesu bi mengi bi mö ma nda tho

(Mt. 17:22-23; Lk. 9:43-45)

9.30 Ne mi bonu'u, bi ñ'o'u har hai Ngalilea, ne himi ne'ö togo nda bödi.

9.31 Ngetho mi uta yá maxte, ne mi embabi:

—Nö'ö Togo ba e bi Njö'i ma da ndatwa yá 'ye ya jö'i, ne ma da tho. Ne ár hñupa da mengi da nte man'agi.

9.32 Ne nuyá maxte himi tso yá mfeni nö'ö mi xipabi'ö, ne mi tsu nda 'yambabi.

Togo töte ár nsu

(Mt. 18:1-5; Lk. 9:46-48)

9.33 Ne bi zonga Nkapernaum, mi yut'u har ngu, ar Hesu bi 'yambabi yá maxte:

—Te ngi mpehu har 'ñu.

9.34 Ha nu'u bi ñhetho, ngetho har 'ñu mi ñöxhnatho'u, mi honi togo ma nda ntöte ár nsu.

9.35 Nu'mú ar Hesu bi hñudi, ne bi zohna nu'u 'ret'amayoho yá maxte, ne bi 'ñembabi'u:

—Nö'ö togo ne da m'u m'et'o, mahyoni xa da m'efa, ne da mepa gatho nu ma'ra.

9.36 Bi gu n'ar tsi bötsi ne bi 'ba'ma madetho, bi dets'i, ne bi 'ñembabi'u:

9.37 —Nö'ö togo da potka ma thuhu japamasu n'ar tsi bötsi, jakamasugi. Ha nö'ö togo jakamasugi, go japamasu togo xpa penkagi.

Nu'u togo hingo ma ñ'unihu, go faxkagihu

(Lk. 9:49-50; Mt. 10:42)

9.38 Ar Xuwa bi 'ñembabi:

—Tsi Utate, xta hanthe n'a enga ya ts'ondöhi juñ'a ár ts'edi ri thuhu. Da höjwe ngetho hindi ñ'owihu.

9.39 Ha nunar Hesu bi 'ñembabi:

—Yo gi hökwabihu, ngetho hinjo'o n'a togo di ot'a ya nt'udi junka ár ts'edi ma thuhu, ne m'efa da ñöman'ugi.

9.40 Ngetho nö'ö togo hingo ma ñ'unihu, faxkagihu.

9.41 Nö'ö togo da 'ra'ahu n'ar tsi 'bada ar dehe potka ma thuhu ngetho yá met'i'ihu ar Kristo, xa majöni di xi'ahu, hinda ma da 'be ár nthöhö.

Ga ntsuñhu hinga othu ar ts'oki

(Mt. 18:6-9; Lk. 17:1-2)

9.42 Nö'ö togo da japi da da n'a nuya tsi bötsi ñ'emugi, xiñho da ts'utwa n'ar dojuni hár 'yuga nö'ö ar jö'i'ö, ne da t'ent'a har dehe.

9.43 Nu'mu ri 'yehu da ja'ahu gi tahu, hyeju. Xiñho gi kuthu mhets'i di k'at'a n'a ri 'yehu, ne hingi mewihu gatho yoho ri 'yehu har tsibi hiñham'u da hwet'i.

9.44 Nunu hingi the ya zu'we, ha nunar tsibi hiñham'u da hwet'i.

9.45 Ha nu'mu ri wahu ja'ahu gi tahu, hyeju. Xiñho gi kuthu mhets'i hinte di tu ri wahu, ne hinge gi mewi ri wahu har tsibi hiñham'u da hwet'i.

9.46 Nunu hingi the ya zu'we, ha nunar tsibi hiñham'u da hwet'i.

9.47 Ha nu'mu ri dahu ja'ahu gi tahu, hnohu. Xiho gi kuthu har ts'ut'wi Jö di k'at'a n'a ri dahu, ne hingi mewihu gatho yoho har tsibi.

9.48 Nunu hingi the ya zu'we, ha nunar tsibi hiñham'u da hwet'i.

9.49 Ngetho gatho ma da thoka har tsibi, jangu gatho ar m'ohö da t'u'sa ar u.

9.50 Ar u xiho, ha nu'mu da 'be ar n'uxi, hanja gi ko'sfu ar nkuhi. Di hno'ahu ar u, ne gi 'buhu n'ar hogam'ui n'a ngu n'a.

Ar Hesu bi nonga nu'u togo he ya nthoti

(Mt. 19:1-12; Lk. 16:18)

10.1 Ar Hesu bi zohnu nor hai'o, bi gu ar 'nu bi ma har hai Nhudea 'randi ar dothe Hordan. Ya jö'i bi mengi bi mhunts'i, ne nö'o bi uti ngu xki znö'o.

10.2 Bi wat'a ya denga'bepate nda hyathmö, ne bi 'yambabi ha nda tsa nda hye ar 'behno n'ar n'ohö.

10.3 Nö'o bi doti ne bi 'nembabi:

—Te bi 'bep'ahu ar Moise.

10.4 Nu'u bi 'neñ'u:

—Ar Moise bi unga ar seki da t'unga n'ar he'mi nhegi, ne nda hyep'u ar 'behno.

10.5 Ar Hesu bi dödi ne bi 'nembabi'u:

—Bi 'yot'a njap'u nunar 'bepatenu, ngetho xa xi me ri nöhu.

10.6 Har ndui, Jö bi hyoka ar ndo ne ar 'behno.

10.7 Jange ar n'ohö da zop'u ar dada ne ar nöno, ne da m'uhwi ar 'behno.

10.8 Ne nuya yohoyu da n'atho. Hindi yoho, n'ase.

10.9 Jange nö'o xi junga Jö, hinda 'weka ar jö'i.

10.10 Nu mi zöñ'u har ngu, nuyá maxte bi mengi bi 'yambabi nö'o xki wadi xki mö.

10.11 Ne ar Hesu bi 'nembabi'u:

—Nö'o togo da hye ar 'behno ne da nthotwi man'a, n'ar tsinganthoti.

10.12 Ha nu'mu ar 'behno da hye ar döme ne da nthotwi man'a, n'ar tsinganthoti n'ehe.

Ar Hesu bi jöpa ya tsi bötsi

(Mt. 19:13-15; Lk. 18:15-17)

10.13 Ne mi ts'impa ya tsi bötsi nda hñuxyá 'ye, ha nuyá maxte mi tsui togo mi tsihi.

10.14 Mi hyanda ar Hesu, bi zot'a ar mu, ne bi 'nembabi'u:

—Hyehu ya tsi bötsi da e da zukagi, ne yo gi höjwu, ngetho gatho nu'u 'bu har ts'ut'wi Jö, nhehwi n'ar tsi bötsi.

10.15 Xa majöni di xi'ahu, nö'o togo hinda hñomba ar ts'ut'wi Jö ngu n'ar tsi bötsi, hinda ma da yutnu.

10.16 Ne mi thex'u, mi hu'spa ya 'ye ne mi jöpi.

N'ar n'ohö xa mi the ya nho bi nöwi ar Hesu

(Mt. 19:16-30; Lk. 18:18-30)

10.17 Mi böñ'o nda mengi nda gu ar 'nu, ba e n'a mi nixt'i ne bi ndandihmö har wa'o, ne bi 'nembabi:

—Ma tsi hoga Utate, tema ga pefi ne da t'aka ar te hinda göts'i.

10.18 Ar Hesu bi 'nenö:

—Yo'o gi engagi dar hogajö'i. Hönse Jö go ar hogajö'i'o.

10.19 Gi pötwa ya 'bepate Jö: Yo gi tsimba ar nthoti ri n'ohu, yo gi nhote, yo gi mpë, yo gi juxa ya nhemhö, yo gi hate, 'ne'spa ar nsu ri dada ne ri nöno.

10.20 Bi dö nunar n'ohö ne bi 'nenö:

—Utate, gathoyu xta ot'e ndi bötsitho.

10.21 Nu'mu ar Hesu bi k'öt'i xa mi mödi, ne bi 'nembabi:

—'Beta n'a te gi pefi: di ma ba pa gatho nö'ö te gi pets'i, ne hyembabi ya hyoya, njap'u gi pe'sa ya ñhonu mañö mhets'i. Ne gi 'yent'a ri te gi e gi tengagi.

10.22 Ha nö'ö mi 'yo nunar mhönu, xa bi du ár müi ne njap'u bi ma, ngetho xa mi the nzeze yá ñho.

10.23 Nu'mú ar Hesu bi hyanda hár nthet'i, ne bi 'ñemba yá maxte:

—Xa xi ñhembi da yut'a hár ts'ut'wi Jö n'ar jö'i hinte k'at'i.

10.24 Nuyá maxte xa bi 'yoda nö'ö te bi mön'ö. Ar Hesu bi döti ne bi 'ñembabi'u:

—Ma tsi bötsi'ihu, xa xi ñhembi da yut'a hár ts'ut'wi Jö nu'u togo xi hñuxyá jamfi ha ya ñho.

10.25 Xi ñhembi da tho n'ar döta meti hár gu n'ar 'yomhni, ha töte ár ñhembi da yut'a n'a hinte k'at'i hár ts'ut'wi Jö.

10.26 Nu mi 'yo njap'u, bi hñuxa yá 'yo'u, ne bi 'ñeñ'u n'a ngu n'a:

—Togo da mpo 'mu.

10.27 Nu'mú ar Hesu bi k'öt'i, ne bi 'ñembabi:

—Nö'ö hingi tsá da 'yot'a ya jö'i, Jö hö, tsá da 'yot'ö, ngetho Jö hinter ñhembibi da 'yot'e.

10.28 Nu'mú ar Pedro bi ndui bi 'ñembabi:

—Nuje xta tsohe xoge xta teñ'ahe.

10.29 Ar Hesu bi dödi ne bi 'ñenö:

—Xa majöni di xi'ahu, gatho nu'u togo xi zop'u ár ngu, yá jödö, yá nju, ár dada, ár nönö, ár 'behñö, yá bötsi, wa xpa tsop'u yá hai xi dengagi mönga ar hoga mhö,

10.30 ma da hñuxa n'anthebe ár nzeze nö'ö xi zop'u: yá ngu, yá jödö, yá nju, yá nönö, yá bötsi, yá hai, mödi da tho ya nt'utsa nuya payu, ne m'efa to'ma ar te hiñham'u da göts'i.

10.31 Nzeze nu'u 'bet'opya ma da m'efa, ha nu'u togo 'befapya ma da m'et'o'u.

Ar Hesu bi mengi bi mö ma nda tho

(Mt. 20:17-19; Lk. 18:31-34)

10.32 Mi 'yo ar 'ñu'u ndi ma Herusalen, ar Hesu mi 'bet'o, ha nuyá maxte xa mi 'yotho, mi teni mi ntsu'u. Nu'mú bi mengi bi 'weka nu'u 'ret'amayoho, ne bi müdi bi xipabi nuya thogi ma nda thogi. Bi 'ñenö:

10.33 —Nupya gar möhö har hnini Herusalen, ne Nö'ö Togo ba e bi Njö'i ma da t'ent'wa ha yá 'ye ya ndömöjö ne ya böt'ofö. Ma da 'yent'u da tho, ne da ndatwa ha yá 'ye nu'u hingya xodyo.

10.34 Ne ma da ts'ani, ma da n'wet'i, ma da ts'ots'i ne da tho, ha nu ár hñupa ma da mengi da nte man'agi.

Ár nt'adi ar Hakobo ne ar Xuwa

(Mt. 20:20-28)

10.35 Nu'mú ar Hakobo ne ar Xuwa yá t'u ar Sebedeo, bi wat'a habu mi 'bu ar Hesu, ne bi 'ñembabi:

—Tsi Utate, di nehe gi ja ar möte gi 'raje nö'ö ma ga a'ahe.

10.36 Nö'ö bi 'ñembabi:

—Tema gi ne ga 'ra'ahu.

10.37 Bi 'ñeñ'u:

—'Rakagihe ar seki xka tsoñhe ha ri nsunda, n'a da hñuxa ha ri ñ'ei, ne man'a ha ri ngöhö.

10.38 Nu'mú ar Hesu bi 'ñembabi'u:

—Hingi pöhu tema gi ahü. Ha gi hanthu gi tsethu ya thogi ngu ma ga tsetka.

10.39 Nu'u bi dödi ne bi 'ñeñ'u:

—Hö ga tsethe.

Ar Hesu bi 'ñembabi'u:

—Majöni ma gi thohu ya thogi ngu ma ga thoka.

10.40 Mödi njap'u, nö'ö gi ne gi hñuxu ha ma ñ'ei ne ha ma ngöhö, hinda tsá ga unga. Ma da t'umba

nu'u togo xi t'ekwabi.

10.41 Nu mi 'yo nu'u ma 'ret'a ya maxte, bi ndui bi mbo ya kwe, himi numanho ar Hakobo ne ar Xuwa.

10.42 Nu'mu ar Hesu bi zo'u ne bi nembabi:

—Gi pohu, nu'u togo xi t'exa ngu ar ndo ha n'ar hai, exya nsu, ne nuya xi t'exa ngu ar noxhmu, xa memnda ya jo'i.

10.43 Nu'ahu yo gi njahup'u. Nu'mu gi ne gi ndotahu, mahyoni gi pefu nu ma'ra.

10.44 Ne no'o togo gi ne gi 'bet'ohu, mahyoni gi m'egohu n'ehe.

10.45 Jahu ngu No'o Togo ba e bi Njo'i. No'o himba ehe honi togo da mepabi, ba ehe da m'ego, ne da unga ar te da gut'wa ya thai nzeze ya jo'i.

Ar goda Bartimeo bi tsu bi hyandi

(Mt. 20:29-34; Lk. 18:35-43)

10.46 Ba e'u Nheriko, ne nu'mu mi 'yo ndi boni, mi n'owi ya maxte, ne nzeze ya jo'i mi teni. Ar goda Bartimeo, ar t'u ar Timeo, mi hu har 'nu mi peti.

10.47 Ne mi 'yode mar Hesu me Nasare no'o mi thohnu, bi ndui bi mafi mi eno:

—Hesu, ar t'u'i ar Dabi, hwegagi.

10.48 Nzeze mi tsui hinga nda mafi, ha no'o xa mi umbar mu mi mafi:

—Ar t'u'i ar Dabi, hwegagi.

10.49 Nu'mu ar Hesu bi m'ai ne bi mo nda ts'ohna ar goda, ne bi nsipabi njawa:

—Yo gi tu ri mu. Nangi ngut'a, zo'a'i gi ma 'no.

10.50 Nu'mu bi 'yemp'u ar pat'i, dama bi nangi ba e bi zu ar Hesu.

10.51 Ar Hesu bi nembabi:

—Te gi ne ga ja'a'i.

Ar goda bi nenö:

—Tsi Utate, di ne da xo ma da.

10.52 Ar Hesu bi nenö:

—Di ma, nuna ri n'emui xi max'a'i xka hñoni.

Ne n'agitho bi tsu bi hyandi, ne bi denga ar Hesu har 'nu.

Ar Hesu bi yut'a Herusalen ngu n'ar ndo mi tho'mi

(Mt. 21:1-11; Lk. 19:28-40; Jn. 12:12-19)

11.1 Nu'mu mi 'butho nda zonga har hnini Herusalen, mi pa'u get'u ha ya t'ulo hnini Betfage ne

Betania, mi kuxa har t'oho Njomdoni. Ne ar Hesu bi mehna yoho ya maxte,

11.2 ne bi nembabi:

—Di mohu har t'ulo hnini gi hanthu 'buhnü, ne nu xki tsoñhu, ma gi tiñhu n'ar tsi t'ulo n'oge di thot'i hinto xi ntoge. Gi xothu ne gi tsihu injawa.

11.3 Ha nu'mu togo da 'nen'ahu: Yo'o gi pehu njap'u, n'emfu: Ar tsi Hmu honi, ne m'efa da mengi da kos'a man'agi.

11.4 Bi ma'u ne bi dinga n'ar tsi n'oge mi thot'a har goxthi n'ar ngu mi 'buta har ñoni ar 'nu, ne bi xot'u.

11.5 Ne 'ra nu'u mi 'buhnü bi nembabi:

—Te gi pehu gi xothu nunar tsi n'oge.

11.6 Nuya maxte bi n'emba ngu xki xipabi ar Hesu, ne bi hye'u.

11.7 Ne ba ts'impa ar tsi t'ulo n'oge ar Hesu, ne bi go'spa ya pat'i'u, ne bi nto'o.

11.8 Ne nzeze mi xi ya pat'i har 'nu, ha ma'ra mi tokwa ya xiza ne mi pokwa habu nda thogi.

11.9 Nu'u mi 'bet'o ne nu'u mi 'befa mi ma'u ne mi eno:

—Xa nsunda Jo. Da jo'pa Jo ar m'ehni.

11.10 Dá jöpa Jö ár ts'ut'wi ma palehu ar Dabi xi 'ñep'u. Nsunda Jö bi 'bu mhets'i.

11.11 Ne bi yut'a ar Hesu núnu Herusalen ne har dönganijö. Ne mi wadi bi hyanda gatho ár nthet'i, bi menga Betania bi mewi yá maxte, ngetho mi fudi nda nxui.

Ar 'bai'iuxi bi ts'ui

(Mt. 21:18-19)

11.12 Nu ár hyax'ö mi boñ'u har hnini Betania, ar Hesu bi ntunthu.

11.13 Bi hyanda yap'u n'ar 'bai'iuxi xa mi heda yá xi, bi ma ba k'öni, xömhö nda dinga te nda zi. Númu mi zoni hinte bi dini ngetho himyá pa ya iuxi.

11.14 Nu'mú bi 'ñemba ar 'bai'iuxi:

—Hinto man'a da zimp'a ri sofo.

Ne nuyá maxte bi 'yo tema xki mö.

Ar Hesu bi p'axt'a ar dönganijö

(Mt. 21:12-17; Lk. 19:45-48; Jn. 2:13-22)

11.15 Ba e'u Herusalen 'mu, ne mi yut'a ar Hesu hár thi ar dönganijö, bi mudi bi 'yenga nu'u togo mi mpa ne mi ntai. Ne bi püspa yá mexa ya patbojö, ne yá nthuts'i nu'u mi pa ya domtxu.

11.16 Ne hinto mi hegi nda na'sa ar nijö te mi muts'i.

11.17 Ne mi utwabi njawa:

—Ha hinxka nehü habü enö: Ma ngu n'ar ngu habü da mat'a Jö gatho ya hnini 'bu har nxidi ar ximhai.

Ha nu'ahu xka jafü ngu n'ar oki habü ñ'önga ya bë.

11.18 Ne bi 'yo nuya böt'ofö ne nuya ndömöjö, mi hongá hanja nda hyohmö. Himi tsá te nda jap'u, mi tsu ya jö'i, ngetho xa mi numañho'u ár nt'uti mi udi.

11.19 Ha mi nxui ar Hesu bi zohnü ar hnini, bi ma.

Ar 'bai'iuxi xki ts'ui bi 'yot'i

(Mt. 21:18-22)

11.20 Ne mi thohnü man'agi ár hyax'ö, bi hyant'u xki 'yot'a ar iuxi xoge ár 'bai ne yá 'yu.

11.21 Nu'mú ar Pedro bi beni, ne bi 'ñembabi:

—Utate, ndi nunar 'bai'iuxi ga tsui, bi 'yot'i.

11.22 Bi dö ar Hesu ne bi 'ñembabi:

—Ñ'emüihu Jö.

11.23 Ngetho majöni di xi'ahu, nö'ö togo da xipa nunar t'ohonu: 'Bai di ma ba tso har ñhonthé, ne hindi yomi, ne kaxmbeni da njap'u, ma da thogi nö'ö xi beni.

11.24 Jange di xi'ahu, gatho nö'ö gi 'yafü Jö, kaxmbenihu ma gi hñöñhu.

11.25 Ne númu gi afü Jö, pumbabihu ma'ra nu'mü ja te gi tsamañ'uhü, ne njap'u ri Dadahu bi 'bu mhets'i da pump'a'ihu ri ts'okihu n'ehe.

11.26 Ngetho nu'mü hingi pumbabihu ma'ra, ri Dadahu bi 'bu mhets'i hinda pump'a'ihu ri ts'okihu n'ehe.

Ar Hesu bi t'ambabi togo mi hömpa ár ts'edi

(Mt. 21:23-27; Lk. 20:1-8)

11.27 Ba penk'u man'agi har hnini Herusalen, ne nu mi 'yo har dönganijö, ba e bi zu ya ndömöjö, ya böt'ofö ne ya dönziandö,

11.28 ne bi 'ñembabi'u:

—Togo gi hömpa ár ts'edi, ne togo xpa peñ'a'i gi 'yot'a nö'ö gi pefi.

11.29 Ar Hesu bi dödi ne bi 'ñembabi'u:

—Ma ga ań'ahụ n'ar nt'ani n'ehe. Nu'mụ gi thöhu, ma ga xi'ahụ togo di hömpa ár ts'edi ga ot'a nö'ö di pefi.

11.30 Nunár xixthe ar Xuwa, ha xki 'ñe mhets'i, wa xki mehnatho ya jö'i. Xikagihü.

11.31 Nu'ü mi ñöse mi eń'ü:

—Nu'mụ ga xifü ndi 'ñe mhets'i, ma da 'ñengagihü 'mụ: Yo'ö hinga ñ'emüibihü.

11.32 Ha nu'mụ ga eńhü xki mehnatho ya jö'i, ma da mbo yá kweyü.

Mi tsu ya jö'i, ngetho mi nu'ü ar Xuwa ngu ár m'ehni Jö.

11.33 Jange bi dö'ü ne bi 'ñembabi ar Hesu:

—Hindi pöhe.

Nu'mü bi dö'ö ne bi 'ñembabi'ü n'ehe:

—Njap'ü nuga hinga xi'ahü togo xpa penkagi ga ot'a nö'ö di pefi.

Ár 'bede ya ts'ońhandi

(Mt. 21:33-46; Lk. 20:9-19)

12.1 Nu'mü ar Hesu bi ndüi mi utam'ede:

—N'ar ñ'ohö bi 'ñet'a n'ar hwöhi'obxi, bi guxa n'ar jödo, ne bi 'ya'ma n'ar moto habü nda de'mi. Bi hyoka n'ar he'sangu nda hyanda xoge. M'efa bi umba ñhandi ma'ra nda su, ne bi ma yap'ü.

12.2 Mi zonga ar pa bi mehna n'ar 'bego ma nda k'ö'sa ya ñhandi, ne nda 'yapa ar sofo ndi 'ñepi nda hñöni.

12.3 Ha nu'ü bi gü bi fenza ne bi kots'i, hõse yá 'ye bi hñöts'i.

12.4 Nö'ö togo már meti ar hwöhi, bi mengi bi mempabi man'ar 'bego. Nuyü bi hyoxa ya nk'ahni, bi zamba ár ñö ne bi kos'ü n'ehe.

12.5 Bi mengi bi mehna man'a, ne nunü bi tho. Ne njap'ü bi mengi bi mehna nzeye, 'ra mi fenza ne ma'ra mi ho.

12.6 Ár ngöts'i, mi 'ñe n'ar t'ü xa mi mödi, bi mempabi n'ehe, mi eń'ö: Numa t'ü ma da numansu.

12.7 Nuya 'bego'ü bi 'ñenga n'a ngu n'a: Gehnü togo ma da gohwi ya ñho. Ba ehü ga hohü ne ga kohwihü yá ñho.

12.8 Ne bi gü'ü bi hyo, ne bi 'yeń'ü nthi har hwöhi.

12.9 Tema da mehmö nuna togo ár meti ar hwöhi 'mü. Ma da ehe ne da hyo ya ts'ońhandi, ne da thokwa ár 'befi ma'ra ya 'bego.

12.10 Ha hinxka nehü nunar t'ofonü enga njawa:

Nö'ö ar do bi 'yemp'uhmö ya guxjödo,

nupya gehnü ar müdi do xi nju'spa ár nijö Jö.

12.11 Gese Jö xi 'yot'a njap'ü,

ne di hanthü nzatho nö'ö bi 'yot'e.

12.12 Nuya ndö xa mi nemhö'ü nda gü, ngetho bi zo yá mfeni go mi hox'ü nunar 'bedenü. Hõse mi tsu nda mbo yá kwe ya jö'i mi 'bühnü, jange bi zohnü bi ma'ü.

Ar Hesu bi nõnga ar bojö jot'a ya ndö

(Mt. 22:15-22; Lk. 20:20-26)

12.13 Ba 'bempabi 'ra ya denga'bepe ne 'ra yá ñ'owi ar Erode, xömhö nda dinga te nda hyoxa ar Hesu.

12.14 Mi zo'ü bi 'ñembabi:

—Utate, di pöhe gi mönga nö'ö majöni, ne hinto gi tsu, ngetho hingi hwanta ya jö'i, majöni gi u ár 'ñu Jö. Hage xiñho ga umfe ar bojö jot'a ar Sesar. Ga uñhe wa hin'ö.

12.15 Ha nö'ö bi bötwá yá ts'omfeni, bi 'ñembabi'ü:

—Yo'ö gi ne gi hyakagihü. Ba hönkagihü n'ar bojö ga handi.

12.16 Nu'ü ba hömpa n'ar bojö, ne bi 'ñembabi'ü:

—Togo ár meüi ar hmi huxkwa ne nö'ö te mö.

Ne bi dö'ü:

—Ár meüi ar Sesar.

12.17 Ar Hesu bi dödi ne bi 'ñembabi'ü:

—Umfü ar Sesar nö'ö ár meüi'ö, ne umfü Jö nö'ö ár meüi'ö n'ehe.

Ne xa bi 'yo'ü.

Ya dengamöjö bi ñ'ani ar menga nte

(Mt. 22:23-33; Lk. 20:27-40)

12.18 Nu'mü ba ep'ü ya dengamöjö nu'ü hingi ñ'emüi da mengi da nte nu'ü xi du, ne bi 'yambabi njawa:

12.19 —Utate, ar Moise bi zogagihü har t'ofu, nu'mü n'ar ñ'ohu da du ne da zo ár 'behñö hinte xi dinga ar bötsi, nu ár jödö da nthötwi ar 'ranxu, ne da gu'spa ár thuhu ár jödö man'agi.

12.20 Gi numhö: Mi 'bü yoto ya ñ'ohu mi njödö. Nunar 'bet'o bi nthöti, ne bi du hinte bi zo ar bötsi.

12.21 Ne nunár ñoho bi nthötwi ar 'ranxu, ne bi du. Njap'unu himbi zokwa ar bötsi, ne nunár hñu bi njap'ü n'ehe.

12.22 Ne bi njap'ü gathu yoto, ne hinte bi dinga ar bötsi. Ár ngöts'i bi du ar 'behñö n'ehe.

12.23 Nú'mü xta zo ar menga nte, ne da nank'ü, togo ár 'behñönu 'mü, ngetho bi nthötwi gathu yoto ya ñ'ohu mi njödö.

12.24 Nu'mü ar Hesu bi dödi ne bi 'ñembabi'ü:

—Xi ts'oka ri mfenihü, ngetho hingi pöhu ar T'ofu, ne hingi pöthwü ár ts'edi Jö.

12.25 Ngetho nu xta mengi da nte ya jö'i man'agi, hinda ma da t'adi, ne hinda ma da nthöti, ngetho ma da ñhehwi yá enxe Jö bi 'bü mhets'i.

12.26 Ha nö'ö nt'ani wa pengi da nte nu'ü xi du wa hin'ö, ha hinxka nehü hár t'ofu ar Moise nú'mü mi zo Jö ha n'ar 'minza mi zo, ne bi 'ñembabi: Nuga ár Jögi ar Abra, ar Isa, ne ar Hakob.

12.27 Jö go ár Jö nu'ü te, hinge nu'ü xi du. Jange nu'ahü xa xka 'be ri mfenihü.

Ar döta 'bepate

(Mt. 22:34-40)

12.28 Bi wat'a n'ar böt'ofu xki 'yode xki dödi xiñho, ne bi 'yambabi:

—Ndana ar 'bepate töpa ár nsu gathu nu ma'ra.

12.29 Ar Hesu bi döti:

—Nunar 'bet'o 'bepate gehnu: Ha gi ohu, menguhü Israel. Ar tsi Hmu ma Jöhu, n'atho.

12.30 Xa gi 'net'a ri müi, gi hñuxa ri mfeni, gi 'yent'a ri te ne ri ts'edi gi mö Jö ri Hmu. Gehnu ar 'bepate töte ár ts'edi.

12.31 Ne nor ñoho di hñöts'i: Gi mö ri mijö'iwu ngu gi mhöse. Hiñ'otho man'ar 'bepate di töte ár nsu.

12.32 Nu'mü nunar böt'ofu bi 'ñembabi:

—Xiñho, Utate. Majöni nö'ö xka mö, n'adar Jö 'büi ne hinjo'o man'a.

12.33 Ne nö'ö togo et'a ár müi, huxa ár mfeni, ent'a ár te ne ár ts'edi da mö Jö, ne da mö ár mijö'iwu ngu mhöse, töpa ár nsu gathu nuya m'ohu ne ya ñhöt'i.

12.34 Ar Hesu nu mi hyandi mi ja ár mfödi, bi dödi ne bi 'ñembabi:

—Hingi 'yo yap'ü gi kut'a hár ts'ut'wi Jö.

Ne hintu bi ne bi 'yot'wa ma'ra ya nt'ani.

Yo'ö mhö ar Kristo ár t'ü ar Dabi

(Mt. 22:41-46; Lk. 20:41-44)

12.35 Ar Hesu mi uta ya jö'i har dönganijö, ne mi enö:

—Yo'ö enga nuya böt'ofö ar Kristo ár t'ü ar Dabi.

12.36 Ngetho gese ar Dabi bi 'ñenö xki nzinga ár Hñö Jö:

Jö ar Dada bi 'ñemba ma tsi Hmu:

Hñu ha ma ñ'ei ga huxkwi,

tö'mi ga tsiñ'a nuya ri ñ'uni ga tsep'a ha ri wa.

12.37 Gese ar Dabi embabi ár Hmu. Yo'ö mhö ár t'ü 'mü.

Ne nzeye ya jö'i xa mi johya mi ots'e.

Ar Hesu bi nomba yá ts'o'bëfi ya böt'ofö

(Mt. 23:1-36; Lk. 11:37-54; 20:45-47)

12.38 Ar Hesu mi embabi ya jö'i ha yá nt'uti:

—Jamahü hinda ka'ahü ya böt'ofö, xa ne da ñ'o di he yá dutu ko'mba yá wa, ne xa ne da nzengwabi ya jö'i di 'benga nt'ek'ei nú'mü 'yo har tai.

12.39 Xa ne da hñuxa ha ya 'bet'o nthuts'i ha ya nijö ne ha ya ñhuni.

12.40 Nuyü tekwa yá ngu ya tsi 'ranxu, ne ot'a 'ra ya nsadi ra ma, ne da go'mahmö. Njap'ü ma da hñönga n'a ra döta mfeiyü.

Ár m'oñho ar tsi hyoya 'ranxu

(Lk. 21:1-4)

12.41 Ar Hesu mi huhnü mi ñhandwitho ár nt'utm'oñho ar nijö. Mi handi hanja ya jö'i mi pa mi tsohnyü yá m'oñho, ne nu'ü mi pe'sa yá ñho xa mi ut'a nzeye.

12.42 Ne ba e n'ar tsi hyoya 'ranxu, bi 'yut'a yoho ya tsi bojö himar mhödi.

12.43 Nu'mü ar Hesu bi ma'ta yá maxte, ne bi 'ñembabi:

—Xa majöni di xi'ahü, nunar tsi hyoya 'ranxunü, töte ár döta ár m'oñho, xi döta gatho nu ma'ra unga yá m'oñho n'ehe.

12.44 Ngetho gatho xi unga nö'ö pongwabi. Ha nunü, mödi mi hyoya, bi unga gatho nö'ö mi pe'shmö nda zi.

Ar Hesu bi mö nda nhwata ar dönganijö

(Mt. 24:1-2; Lk. 21:5-6)

13.1 Mi bönga ar Hesu har dönganijö, n'a nuyá maxte bi 'ñembabi:

—Utate, ndi, tengü ár nzatho ya do ne ár ñhets'i yá jödo ar nijö.

13.2 Ar Hesu bi dödi ne bi 'ñenö:

—Ha gi handa nuya döta jödoyu. Gatho ma da thext'i, hinda ma da go n'ar do mañör midowi.

Ya nt'udi di 'bet'o ne ka da e ar ngöts'i

(Mt. 24:3-28; Lk. 21:7-24; 17:22-24)

13.3 Mi zonga ar Hesu har t'ohö Njömdöni, bi hñudi mi ñhandwi ar dönganijö. Ha nu ar Pedro, ar Hakobo, ar Xuwa, ne ar Andre bi 'yambase:

13.4 —Xikagihe, ham'ü ma da tho gathoyü. Tema nt'udi ma da nheki, ne da födi 'bap'ütho da göxa gathoyü.

13.5 Ar Hesu bi dötwabi'ü ne bi 'ñembabi:

—Jamahü, yo ma gi ñhehü to da ka'ahü.

13.6 Ngetho ma da e nzeye togo da gumka ma thuhu da 'ñenö: Nuga go dar Kristo. Ne njap'ü da ka

nzeye ya jö'i.

13.7 Ha nú'mu xki 'yohu habu gatho di ja ya tuhni, ne ma'ra ma da ndui, yo gi tu ri muihu. Ngetho mahyoni da tho njap'u, mödi hinxi zota ár ngöts'i ar ximhai.

13.8 Ngetho ya hnini ma da ntukwi yá mihniniwi, ya ndö ma da ntunkwi yá mindöwi. Ne xa hagatho ma da nhwönga ar hai, ne ma da nja ar thuhu, ne ya jö'i xa di muxmatho. Hönse ár nduinu ya ugi xi 'nep'u.

13.9 Ha ntsunsehü, ngetho ma da ts'ix'ahu ha ya ts'ut'wi, ne da mfenza'ihu ha yá nijö ya xodyo. Ma da m'ap'ahu ha ya ts'ut'wi ne ya ndö ngetho gi tengagihu, njap'u da tsa gi dathu majöni xka pökagihu.

13.10 Ne mahyoni m'et'o da mhönga ar hoga mhö ha gatho ya hai jawa har ximhai, ne ka da e ar ngöts'i.

13.11 Ha nu'ahu, nu xta ts'ix'ahu ma da ndat'ahu ha ya ndö, yo gi tu ri muihu tema gi mönhu, ne hingi hyoñhu tema gi thöhu. Ge'mu ma da t'a'ahu tema gi mönhu, ngetho hingo ge'ahu togo gi ñöhu, go ñö ár Hñö Jö 'bu ha ri muihu.

13.12 Nuya njödö ma da dase ár jödö da tho. Ne nuya dada ma da dase yá bötsi, ha nuya bötsi ma da gu yá dada da hyo.

13.13 Ne gatho ma da utsa'ihu ngetho gi tengagihu. Nö'ö da zetatho, da do'mi da göxa xoge nuya thogiyu, go ma da mpo'ö.

13.14 Ha nú'mu xki hyanthu ar ts'oki xi nts'otho di 'bu habu hingi ho da m'ui, ngu bi 'yot'a ar m'ehni Dañe (nö'ö togo nehe, dá bödi xiñho teme ne da mö), nu'u togo gi 'buhunu Nhudea, di ma ba ñ'öñhu ha ya t'ohö.

13.15 Nu'u togo gi tohu mañö ar ngu, yo ma gi kuthu te gi juju. Nixt'i di möhu.

13.16 Ha nu'u togo gi 'yohu har 'batha, yo ma gi penju gi juju ri pat'ihu.

13.17 Hwëkate nu'u ya 'behñö di n'u, ne nu'u di tsi yá bötsi di tsuda nuya pa'u.

13.18 'Yapabihu Jö, nunar pa gi nixt'ihu, hinda dat'a ya pa xi ntse.

13.19 Ngetho nuya pa'u xa ma da nja ya thogi ngu hinxka hyanthu man'a, nú'mu Jö bi hyoka ar ximhai, ne xta thogi hinda ma da nja man'a ngu'ö.

13.20 Ha nu'mu ar tsi Dada hinda japi da göxa nuya pa'u, hinto ma da bonk'mu. Ma da jös'ö, ngetho ma da maxa togo xi hwañ'ö.

13.21 Jange nu'mu da t'eñ'ahu: Ndi, ka bi 'bukwa ar Kristo, wa da t'eñ'ahu: Ndi, bi 'buhnu, yo ma gi jafumasu.

13.22 Ngetho ma da nja ya kate Kristo ne ya kate m'ehni. Ne ma da 'yot'a ya döta nt'udi da hyat'a ya jö'i, ne nu'mu da tsahmö, da hyat'a nu'u xi hwahna ar tsi Dada.

13.23 Ha nu'ahu, zot'a xiñho ri dahu, ngetho xta xi'ahu nö'ö ma da thogi.

Ár ño'gi 'ñehe Nö'ö Togo ba e bi Njö'i

(Mt. 24:29-35, 42-44; Lk. 21:25-36)

13.24 Nú'mu xta göxa nuya pa'u ñ'utho, ar hyadi ma da m'exui, ha nunar zönö hinda ma da unga ár hyats'i.

13.25 Ne nuya tsö ma da hyo, ha nuya ts'edi bi 'bu mhets'i ma da nhwöt'i.

13.26 Ne ma gi hyanthu 'mu Nö'ö Togo ba e bi Njö'i, ma da nheki di e ha ya gui, di hö n'ar döta ts'edi ne n'ar döta nsunda.

13.27 Ne ma da mehna yá enxé 'mu, da muspa gatho nu'u togo xi hwañ'ö xoge hár nxidi ar ximhai, ne habu di göxa mhets'i.

13.28 Hyanthu ar 'bai'iuxi ne beñhu tema utkagihu: Nú'mu pöxa yá n'ogi ne k'onts'a yá xi, gi pöhu 'bap'utho ar pahyadi.

13.29 Njap'u nu'ahu n'ehe, nu xki hyanthu da tho gatho nuya thogiyu, pöhu, 'bap'utho da göxa xoge.

13.30 Xa majöni di xi'ahu, hinda theta nuya jö'i 'bu nuya payu, ne xi wadi xi tho gatho nuya thogiyu.

13.31 Mödi da m'edi ar mhets'i ne ar ximhaji, nuya mhö xta mönga, hinda ma da m'edi.

13.32 Nor pa ham'u ma da göxa xoge hinto pödi. Nuya enxe bi 'bu mhets'i hingi pöhmö n'ehe, ne ár T'u Jö hingi pödi, hönse ar Dada go pö'ö.

13.33 Zothu ri dahu, ndo'mhu ne 'yafu Jö, ngetho hingi pöhu ham'u da zo ar ngöts'i.

13.34 Ñhewi n'ar n'ohö bi ma yap'u, bi zo ár ngu ne bi umba ar ts'edi nuyá 'bego. Bi zokwa yá 'befi n'a ngu n'a, ne ar sugoxthi bi xipabi hinga nda n'öhö.

13.35 Jange ndo'mhu, ngetho hingi pöhu tema xenimpa da ep'u togo ár meti ar ngu, wa xta nde, made nxui, hár mhafi ar boxi, wa xta hats'i.

13.36 Nu'mu n'a nda ep'utho, hinda diñ'ahu gi öthu hingi to'mhu.

13.37 Ne nö'ö di xi'ahu, get'ö di xipabi gatho: Ndo'mhu.

Ya ndöxodyo mi nkohi hanja nda gu ar Hesu

(Mt. 26:1-5; Lk. 22:1-2; Jn. 11:45-53)

14.1 Ár yopap'u mar baxjwa ne ar dango mi ts'i ar thuhme himi jots'i, nuya ndömöjö ne ya böt'ofö mi hongha hanja nda gu ar Hesu n'öntho, ne nda hyo.

14.2 Ne mi eñ'u:

—Hinda tsä ga juhü ha ya pa dango, ngetho da muxma ya jö'i.

Ar Hesu bi nhö'spa n'ar hogañuni núnu Betania

(Mt. 26:6-13; Jn. 12:1-8)

14.3 Nu mi 'buhnu Mbetania hár ngu ar Simu xki hye ar hñeni tsit'ando'yo, ne nú'mu mi hu har mexa, n'a mba ep'utho n'ar 'behñö mi hö n'ar xito t'axdo, mi po n'ar hogañuni xa mar mhödi. Bi tehma nunar xito ne bi nö'spa ár n'ö ar Hesu nunar hogañuninu.

14.4 Ja 'ra togo bi mbo yá kwe, ne mi eñ'u:

—Yo'ö xi t'emp'utho nunar hogañuninu.

14.5 Ngetho mi tsä xi 'ba ngu n'a njeye ár nthöhö n'ar jö'i, ne xi themba ya tsi hyoya.

Ne xa mi theñ'u nuna tsi 'behñö.

14.6 Nu'mu ar Hesu bi 'ñembabi'u:

—Hyehunu. Yo'ö gi theñü. Nzatho nö'ö xi 'yotkagi.

14.7 Nuya hyoya hyax'mu ma gi 'buhwihu, ne da tsä gi 'yothwu ar ñho nu'mu gi nehü. Ha nuga hinga hyax'mu ma gi hyandgagihuwa.

14.8 Nunü xi umbár müi xi 'yot'a nö'ö mi tsä nda mefi. Ne nunar hogañuninu xi goxkagi, gehnu n'ar ñhoki di to'ma ha ma n'agi.

14.9 Xa majöni di xi'ahu, habu gatho ma da mhönga nunar hoga mhönu xoge ár nxidi ar ximhaji, ma da mhönga nö'ö xi 'yotnu ngu n'ar feni.

Ar Huda bi mö nda da ar Hesu

(Mt. 26:14-16; Lk. 22:3-6)

14.10 Ar Huda Iskariote 'mu, n'a nu'u 'ret'amayoho yá maxte, bi ma ba k'önga ya ndömöjö, mi ne nda datwa ar Hesu.

14.11 Nú'mu mi 'yoyü xa bi njohya, ne bi ñöt'i nda umba ar bojö. Ha nunar Huda mi honi hanja nda tsä nda datwabi'u.

Ar tsi Hmu bi zogi nda ts'impa ár t'oxi

(Mt. 26:17-29; Lk. 22:7-23; Jn. 13:21-30; 1 Co. 11:23-26)

14.12 Nö'ö ar pa bi ndui ar dango ts'i ar thuhme hinxi jots'i, nú'mu mi tho ngu n'ar m'öñhö ar ndöni mbaxjwa, nuyá maxte ar Hesu bi 'ñembabi:

—Habü gi ne ga hoje ar t'oximbaxjwa.

14.13 Ne bi mehna yoho yá maxte, bi 'ñembabi'u:

—Di möhü har hnini, ne nu xki nthewihü n'ar ñ'ohö muxa n'ar xoni ar dehe, teñhü.

14.14 Nu habü da yut'i, gi 'ñembabihü nö'ö togo ár meti ar ngu: Ar Utate ba pēhna ar nzengwa ga eñ'ahe njawa: Habü 'bü ar ngu di hoñhe ga tsi'be ar t'oximbaxjwa ma maxte.

14.15 Ne nö'ö ma da ut'ahü n'ar döta ngu di to mañö, xi thoki xiñho. Ka gi hyojunü ar t'oximbaxjwa ga tsihü.

14.16 Nuyá maxte mi zoñ'u har hnini, bi diñ'u ngu xki nsipabi, ne bi hyoknü ar t'oxi.

14.17 Nu mi nxui ar Hesu ba ehwi nu'u 'ret'amayoho yá maxte.

14.18 Nú'mü mi hñuhnü har mexa mi nt'oxi, ar Hesu bi 'ñembabi'u:

—Xa majöni di xi'ahü, n'a di ñungwihü, ma gi dagagihü.

14.19 Nu'u xa bi du yá müi, ne bi ndui bi 'yambabi'u n'a ngu n'a:

—Ha go geke.

Ne man'a mi embabi:

—Ha go nuga.

14.20 Nö'ö bi dödi ne bi 'ñembabi'u:

—N'a nu'u 'ret'amayoho togo n'adar mohi di thinthwü mahyegi ar thuhme.

14.21 Majöni Nö'ö Togo ba e bi Njö'i 'ba ar ñu da tho ngu xi t'ot'wabi, ne hwékate nö'ö togo ma da da'ö. Xiñhohmö hinxi zokwa har ximhai.

14.22 Ne nú'mü mi nt'ox'u, ar Hesu bi gü ar thuhme ne bi 'yapa Jö nda jöpi. Bi heke bi hembra yá maxte, ne bi 'ñembabi'u:

—Tsihü; gehnü ma ndo'yo.

14.23 M'efa bi güxa ar t'eni mi po ar t'afi'obxi, bi umba njamödi Jö, bi thokwa yá maxte, ne gatho bi zi n'a tsi nts'iki.

14.24 Ne bi 'ñembabi'u:

—Gehnü ma ji ma da nhö'mi da epa ár ñho nzeyē ya jö'i, ne njap'u da go ar 'ra'yo nkohi.

14.25 Di xi'ahü, hinga pengi ga tsipa ár t'afi ar 'bai'obxi nuya payü. Ma ga to'mi ga tsi ma'ra'yo hár ts'ut'wi Jö.

Ar Hesu bi mö nda konga ar Pedro

(Mt. 26:30-35; Lk. 22:31-34; Jn. 13:36-38)

14.26 Nu mi wadi bi ntu'u n'ar jöhñö, bi böñ'u ndi ma har t'ohö Njömdöni.

14.27 Nu'mü ar Hesu bi 'ñembabi'u:

—Nunar nxuinü gatho ma gi hyegasegihü, ngetho xi t'ot'a har T'ofö, enö njawa: Ma ga ho ar ma'yo, ne da mfont'a xoge yá deti.

14.28 Ha nú'mü xka pengi ga nte man'agi, ma ga 'bet'o gar nthehünü Ngalilea.

14.29 Nu'mü ar Pedro bi 'ñenö:

—Mödi gatho nu'u ma'ra da hyek'a'i, nuga hinga ma ga hek'ase.

14.30 Ha nu ar Hesu bi 'ñembabi:

—Xa majöni di xi'a'i, nunar nxuinü hinxi zöta ár ñoho ár mhafi ar boxi, ha nu'ge ya xka kongagi hñu'gi.

14.31 Ha nunar Pedro himi tsaya mi enö:

—Mödi ga tuga n'ehe, hinga koñ'a'i.

Ne gatho nu ma'ra mi mönga njap'u n'ehe.

Ar Hesu bi 'yapa Jö ár Dada núny Getsemani

(Mt. 26:36-46; Lk. 22:39-46)

14.32 Ba e'u núny habü t'embabi ar Getsemani, ne ar Hesu bi 'ñemba yá maxte:

—Hñuhüwa. Nuga ma ga apats'ü Jö ma Dada.

14.33 Ne bi zixa ar Pedro, ar Hakobo, ne ar Xuwa, ne bi ndui xa bi du ár müi.

14.34 Bi 'ñembabi'ü:

—'Bütho ga tu ar dumüi. Kohüwa ne ndo'mhu, yo gi öhu.

14.35 Bi tho man'a tsi tui ár yap'ü ne ka bi ndandihmönü. Ne bi 'yapa Jö, nu'mü nda tsahmö, hinga nda zopabi nuya thogi ñ'ütho mi ep'ütho.

14.36 Ne mi enö:

—Ma tsi Dada'i, nu'ge hinter ñhemb'i. Hñöga nuya thogi xi 'ñep'ü. Mödi hindi ne gi 'yot'a ngu di nega, 'yot'a ngu gi nege.

14.37 M'efa ba ehe ne bi dinga nuya hñuyü mi öhö, ne bi 'ñemba ar Pedro:

—Simu, ha gi öhö. Ha himbi tsä ga nuta n'a tsi xenimpa.

14.38 Zot'a ri dahü ne 'yafu Jö gi tsethü ya ts'othogi xta ep'ü. Xa majöni ri hñöhu 'bui da tseti, ha nuna ri ndo'yohü k'at'a ár ts'edi.

14.39 Bi ma ba apa Jö man'agi, ne bi mengi bi xipa nuya mhö xki xipa m'et'o.

14.40 Nu mba pengi bi diñ'ü mi öhö man'agi, ngetho nuyá da'ü xa mi kö ya t'öhö, ne himi pö'ü te nda dödi.

14.41 Ba e ár hñu'gi, ne bi 'ñembabi'ü:

—Nupya hö, te ri t'öhöhu ne kö ri ndo'yohü. Xi zo ar pa xi thuts'i, ma da ndatwa ha yá 'ye ya 'yot'ats'oki Nö'ö Togo ba e bi Njö'i.

14.42 Nanju möhö, ba ehnu nö'ö togo ma da dagagi.

Ar Hesu bi nju

(Mt. 26:47-56; Lk. 22:47-53; Jn. 18:2-11)

14.43 Himi jwata nda ñö ar Hesu nú'mü mba ep'ü ar Huda, n'a nuya 'ret'amayoho yá maxte. Ne mi ñ'owi nzeye ya jö'i mi hö ya ndojwai ne ya za, xki mehna ya ndömöjö, ya böt'ofö, ne ya dönziandö.

14.44 Ha nö'ö togo mi da, xki nkohwi ya jö'i ne xki 'ñembabi:

—Nö'ö togo gi hyanthü ga tsuspa ár hmi, gehnu gi hoñhu. Juhü ne xothü xiñho gi tsixü.

14.45 Nu mi zohö, dama bi wat'a habü mi 'ba ar Hesu, ne bi 'ñembabi:

—Utate.

Ne bi zuts'i.

14.46 Nuya jö'i mü, dama bi wat'i ne bi gu ar Hesu.

14.47 Ha n'a nu'ü mi 'buhwinü, bi k'o'sa ár jwai, ne bi dakwa ár gu ár 'bego ar döngamöjö.

14.48 Nu'mü ar Hesu bi 'ñembabi ya jö'i:

—Hage dar bë xka ehü gi mikagihü, gi höhu ya jwai ne ya za.

14.49 Hyax'mü ndi 'buhwihü har dönganijö, ne hinte ga jaju. Ne xi njanu, njap'ü da tho ngu mönga har T'ofö.

14.50 Nu'mü gatho nuyá maxte bi zohnü bi nixt'i bi ma'ü.

Ar bötsi bi nixt'i

14.51 Ha n'ar bötsi mi teni, honse xki mpaça n'ar dutu, ne nu mi nju,

14.52 dama bi zop'ü ar dutu ne bi nixt'i ngotho.

Ar Hesu bi m'a'ma har mhunts'andö

(Mt. 26:57-68; Lk. 22:54-55, 63-71; Jn. 18:12-14, 19-24)

14.53 Ba ts'i ar Hesu bi m'amba ar döngamöjö, ne bi wat'a gatho ya ndömöjö, ya dönziandö ne ya böt'ofö.

14.54 Ha nunar Pedro bi denda yap'ü, ne bi zonga hár thi ar döngamöjö, bi hñuhwi ya ndogu mi

mpat'a har tsibi.

14.55 Nuya ndömöjō ne gatho ar mhunts'andō, mi hongā te nda hyoxa ar Hesu ne nda t'ent'i nda tho, hinte mi tiñ'u.

14.56 Ngetho nzeje mi hoxa ya nhemhñō, mödi himi nthexkwi nö'ō te mi möñ'u.

14.57 N'a mbi m'ata 'ra bi hyoxa ya nhemhñō, mi eñ'u:

14.58 —Nuje xta ohe xi 'ñenō: Nuga ma ga yot'a nunar nijönü xi hyoka ar jō'i, ne ár hñupa ga pengi ga juxa man'a, hinte ma jō'i xi hyoki.

14.59 Ha nuyü n'ehe himi nthē nö'ō mi möñ'u.

14.60 Nu'mú ar döngamöjō bi m'a made ne bi 'ñemba ar Hesu:

—Ha hinte gi thōdi. Te di bonga nö'ō thox'a'i.

14.61 Nö'ō mi ñhetho, hinte bi dödi. Ar döngamöjō bi mengi bi 'yani ne bi 'ñenō:

—Hage go ge'e ar Kristo, ár T'u nö'ō togo nsundabi.

14.62 Ne ar Hesu bi 'ñembabi:

—Hö, go geke. Ne ma gi hyanthü Nö'ō Togo ba e bi Njō'i di hu hár ñ'ei Jö togo pe'sa gatho ar ts'edi, ne di ehñü ha ya gui mhets'i.

14.63 Nu'mú ar döngamöjō bi xika ár he, ngetho mi beni ar Hesu xki ñömañ'ubi Jö, ne bi 'ñenō:

—Te ga jafü man'a te da hyots'e.

14.64 Xka 'yohü teme xi mö. Te gi möñhü.

Ne gatho'u bi hyox'u ndi 'ñepi nda tho.

14.65 Ne 'ra bi müdi mi tsots'i. Mi kotwa yá da ne xa mi umba ya mfei, ne mi embabi:

—Xije togo bi mep'a'i.

Ne nuya ndogu xa mi umba ya mpetgu.

Ar Pedro bi konga ar Hesu

(Mt. 26:69-75; Lk. 22:55-62; Jn. 18:15-18, 25-27)

14.66 Ar Pedro mi 'buhñü hai har thi, ne n'a mba ep'utho n'ar 'behñō mi pepa ar döngamöjō.

14.67 Ne mi hyanda ar Pedro mi mpat'a har tsibi, bi 'ñenō:

—Nu'ge n'ehe ngi ñ'owi ar Hesu me Nasare.

14.68 Ha nö'ō bi nkoni bi 'ñenō:

—Hindi pōka togo'ō. Hindi pōhmö tema gi mö.

Ne bi wat'a har goxthi. Ne ge'mü bi ma ar boxi.

14.69 Ne nunar 'behñönü mi hyanda man'agi, bi müdi bi 'ñemba nu'u mi 'buhñü:

—Nunü go yá ñ'ohü'u.

14.70 Ha nö'ō bi mengi bi nkonga man'agi. Ne hingar ya'ō nu'u mi 'buhñü bi mengi bi 'ñembabi ar Pedro:

—Majöni nu'ge go ár ñ'owi'u n'ehe, ngetho gar me Ngalilea, ne gi ñö mahyegi ngu ñö'u.

14.71 Nö'ō bi ndüi bi ntsate ne mi et'a made Jö, mi enö:

—Hindi pōka togo ar ñ'ohö gi noñhü.

14.72 Ne ar boxi bi ma ár ño'gi. Nu'mú ar Pedro bi benga nö'ō te xki mönga ar Hesu: Hinxi zōta ár ñoho ár mhafi ar boxi, ha nu'ge ya xka kongagi hñu'gi. Mi oda ár mfeni njap'u, xa mi zoni.

Ar Hesu ma ba m'amba ar Pilato

(Mt. 27:1-2, 11-14; Lk. 23:1-5; Jn. 18:28-38)

15.1 Ár hyax'ō ra n'itho, mi wadi bi nko'u ya ndömöjō, ya dönziandō, ya böt'ofō ne gatho ar mhunts'andō, bi zix'u ar Hesu xki nsot'e, ma ba ent'wa hár 'ye ar Pilato.

15.2 Ar Pilato bi 'yambabi ar Hesu ne bi 'ñembabi:

—Hage go ge'e ár Ndö ya xodyo.

Nö'ö bi dödi ne bi 'ñembabi:

—Hö, ngu xka mönse.

15.3 Ne nuya ndömöjō xa te gatho mi hots'e.

15.4 Man'agi ar Pilato bi 'yambabi ar Hesu ne bi 'ñenö:

—Ha hinte gi thödi. Ndimhö te gatho thox'a'i.

15.5 Ha nunar Hesu hinte bi dödi, jange ar Pilato xa mi 'yotho.

Ar Hesu bi t'ent'i nda tho

(Mt. 27:15-31; Lk. 23:13-25; Jn. 18:38-19:16)

15.6 Ar ndö xki nzöi nda hyekwa n'ar 'yofadi har dango nö'ö nda 'ya'u.

15.7 Ne mi onu n'a már thuhu Baraba, xki jot'wi yá n'ohu, ngetho xki ñhote nú'mu xki njuts'i nda ntukwi ar ndö.

15.8 Ne mba e gatho ya jö'i, bi ndui bi 'yapabi nda umba ngu xki nzöi mi umba tat'a dango.

15.9 Har Pilato bi dötwati'u njawa:

—Ha gi ne ga hek'ahu ár Ndö ya xodyo.

15.10 Mi pö'ö xki ndatwabi ngetho xki zot'wa yá mui nuya ndömöjō.

15.11 Ha nuya ndöyü mi ka ya jö'i nda 'ya'u nda the ar Baraba.

15.12 Ar Pilato bi dödi ne bi 'ñembabi'u:

—Tema gi nehü ga japka nö'ö gi emfu ár Ndö ya xodyo 'mu.

15.13 Ne nu'u bi mengi bi mafi, mi eñ'u:

—Tsuta har pont'i.

15.14 Ar Pilato mi embabi:

—Tema ts'oki xi 'yotnu.

Ha nu'u xa bi gahni bi mafi mi eñ'u:

—Tsuta har pont'i.

15.15 Ha nu ar Pilato mi ne nda gohwi xiñho ya jö'i, jange bi xoka ar Baraba. Ha nu ar Hesu bi mö nda n'wext'i, ne bi datwa ya jö'i nda tsuta har pont'i.

15.16 Nu'mú, nuya ndogu bi zixa mbo hár thi ar döta ts'ut'wi, ne bi ts'ohna gatho yá mindoguwi mi 'buhnu.

15.17 Ne bi gö'spabi'u n'ar thenga dutu, ne bi hñu'spabi n'ár ntsant'i ya 'mini xki m'e.

15.18 Bi müdi bi zengwabi'u njawa:

—Xar tsi te, ár Ndö'i ya xodyo.

15.19 Ne mi ju n'ar t'o mi femba ár ñö, mi tsox'u, ne mi ndandihmō mi ndön'u emp'ö.

15.20 Nu mi wadi bi t'ot'wa ar thede, bi thökwa ar thenga dutu xki njö'spabi, bi thetwa yá dutuse, ne bi njuki nda ts'uta har pont'i.

Ár nts'uti ar Hesu har pont'i

(Mt. 27:32-44; Lk. 23:26-43; Jn. 19:17-27)

15.21 Mi thohnu ar Simu me Sirene, ár dada ar Handro ne ar Rufo, xki 'ñe har hwöhi, bi njapi nda hñöxa ar pont'i habu nda ts'uta ar Hesu.

15.22 Ne bi ts'ixa habu mi t'embabi ar Golgota, di boni da 'ñenö Nñöxhundo'yo.

15.23 Ne nunu bi t'umbabi ar ixkat'afi, mi nthöskwi n'ar bopo xi nju ár thuhu ar mira, ha nö'ö himbi ne bi zi.

15.24 Nuya ndogu mi wadi bi tsut'u har pont'i, bi ñhe'u yá dutu, mi ents'a ya nthöhö nda nu'u te nda hñöxa n'a ngu n'a'u.

15.25 Mi tsu ngu n'ar guto xudi nú'mu mi ts'uti.

15.26 Ne nunar xithe habu xki t'ot'a yo'ö xki ts'uti, mi enö: Gehnu ár Ndö ya xodyo.

15.27 Bi ts'utwi ma yoho ya n'oho ma ya bë, n'a hár n'ei ne man'a hár ngöhö.

15.28 Njap'u bi thogi ngu xki t'ot'a har T'ofu habu enö: Bi nhu ngu n'ar ts'okte.

15.29 Ha gathu nu'u mi thohnu, xa mi theni, ne mi hwöt'a yá nñö mi en'u:

—Xipya, ngi enö ngi yot'wa ár nijö Jö, ne ar hñupa ngi pengi ngi juspa man'agi,

15.30 mpose 'mu, ne kö habu gi zudi.

15.31 Mi njap'u nu'u ya ndömöjö n'ehe, mi theni. Ne ya böt'ofu mi mpehwi mi en'u n'a ngu n'a:

—Bi po ma'ra, ne hingi tsa da mpose.

15.32 Nunar Kristo 'nö, ár Ndö ya me Israel, dá göpya har pont'i. Ga hanthe ne ga n'emuihe.

Ha nu'u togo xki ts'utwi mahyegi mi theni n'ehe.

Ar Hesu bi du

(Mt. 27:45-56; Lk. 23:44-49; Jn. 19:28-30)

15.33 Nu mi zonga madempa bi m'exui xoge ar ximhai, ne bi wadi mi zot'a hñunde.

15.34 Nu mi zonga hñunde, ar Hesu bi 'nenö nts'edi:

—Eloi, Eloi lama sabaktani, —pontho da 'nenö: Ma tsi Dada'i, ma tsi Dada'i, yo'ö xka hyegase.

15.35 'Ra nuya mi 'buhnu mi 'yode bi 'nen'u:

—Hyanthu hanja zo ar Elia.

15.36 Ne bi nixt'i n'a, ma ba po n'ar xi'yo har ixkat'afi. Bi tuta ha n'ar xithi ne bi kwatwa hár ne, ne bi 'nen'ö:

—Hyehu, ma ga to'mhu ha da e ar Elia da mats'i.

15.37 Har Hesu bi mafi nts'edi, ne bi du.

15.38 Nu'mú bi xita made ar döta dutu mi naxa mbo har dönga nijö, mi kot'a habu xa mar nsunda, ba ndu mañö bi göxa hai.

15.39 Ha nunar döndogu mi 'bahnu mi nhandwi ar Hesu, mi hyandi bi du njap'u xki wadi bi mafi nts'edi, bi 'nen'ö:

—Xa majöni nunar n'ohonu már T'u Jö.

15.40 Mi 'buhnu 'ra ya 'behñö n'ehe mi handatho yap'u. Mi n'owi'u ar Maria me Magdala, ar Salome, ne ar Maria ár nönö ar 'befa Hakobo ne ar Huse.

15.41 Nu mi 'buhyu Ngalilea mi teni ne mi fats'i, ne ma nzeyu xki deni mba e Herusale.

Ár nt'agi ar Hesu

(Mt. 27:57-61; Lk. 23:50-56; Jn. 19:38-42)

15.42 Nú'mu 'butho nda yu ar hyadi nor pa'ö ar n'hoki, nunar hyax'öp'u mar pa ntsaya,

15.43 nunar Huse me Arimatea mi 'buhwi ar mhunts'andö, ne xa mi nhumañho, mi to'mi nda hyandwa ár ts'ut'wi Jö n'ehe, bi zeta ár mu ne bi yut'i ma ba nñöwi ar Pilato, bi 'yapa nda umba ár ndo'yo ar Hesu.

15.44 Ar Pilato xa bi 'yotho mi 'yode xki du. Bi zofo nda e ar döndogu nda 'yambabi ha majöni xki du.

15.45 Ne mi wadi bi damajöni ar döndogu, bi t'umba ar Huse ár ndo'yo ar Hesu.

15.46 Ar Huse bi danga n'ar t'axdutu, ne bi kö'mba ár ndo'yo har pont'i. Bi mats'i, ne bi 'yent'a ha n'ar t'agi xki nsama ha n'ar ndodo, ne bi tönga n'ar döta do bi gotwa ár goxthi ar t'agi.

15.47 Ha nunar Maria me Magdala ne ar Maria ár nönö ar Huse mi hant'u habu bi t'agi.

Ar Hesu bi mengi bi nte

(Mt. 28:1-10; Lk. 24:1-12; Jn. 20:1-10)

16.1 Nu mi tho ar pa ntsaya, ar Maria me Magdala, ar Maria ár nönö ar Hakobo, ne ar Salome, bi danga ya hogañuni ma nda go'spa ár ndo'yo ar Hesu.

16.2 Ne ár hyax'ö ra n'itho ár ndui ar hñöto, ba e'u har t'agi, mi k'onts'a ar hyadi.

16.3 Nu mi 'yo har 'ñu, mi ense'u n'a ngu n'a:

—Xípya, togo da hñögagihuts'u ar do kot'a ar t'agi.

16.4 Ne mi hyant'u, bi nu'u xki thöka ar do. Nunar donu xa mar döta.

16.5 Ne nu mi yut'u har t'agi, bi hyant'u mi huhnu har ñ'ei n'ar bötsi, mi he n'ar t'axhe mi jut'atho. Ne xa bi zu'u.

16.6 Ne nunu bi 'ñembabi'u:

—Yo gi ntsuhu. Gi hoñhu ar Hesu me Nasare nö'ö togo bi ts'uta har pont'i. Bi mengi bi nte. Ndi, hyanthu habu bi 'begi, hinte jawa.

16.7 Jange di möhu ba xipabihu yá maxte ne ar Pedro: Bi m'et'o di ma Ngalilea, ja gi hyanthunu ngu bi xi'ahu.

16.8 Ne xa bi nixt'i bi ma'u, ngetho xa xki zo ar mbidi yá müi. Ne hinto mi ñöwi'u, ngetho xa mi ntsu.

Ar Hesu bi ñ'udi nda hyanda ar Maria me Magdala

(Jn. 20:11-18)

16.9 Nu mi mengi bi nte ar Hesu n'itho har 'bet'o mpa ar hñöto, bi ñ'udi bi hyanda m'et'o ar Maria me Magdala, togo xki 'yemba yoto ya ts'ondöhi.

16.10 Nunar 'behñönu bi ma ba k'önga nu'u mi ñ'owi ar Hesu. Nuyu xa mi tu yá müi mi zofi'u, ne nunar 'behñö bi xipabi xki hyant'ö.

16.11 Nu mi 'yo'u mi tetho ne xki hyant'ö, himbi ñ'emüi.

Ar Hesu bi ñ'udi bi hyanda yoho nuya mi teni

(Lk. 24:13-35)

16.12 M'efa bi ñ'udi n'añ'o, bi hyanda ma yoho nuya mi teni, mi 'yo ar 'ñu ndi ma har 'batha.

16.13 Nuyu n'ehe bi ma ba xipa nu'u ma'ra. Njap'utho himbi ñ'emüibi.

Ar Hesu bi mehna yá mpöte

(Mt. 28:16-20; Lk. 24:36-49; Jn. 20:19-23)

16.14 M'efa bi ñ'udi bi hyanda nu'u 'ret'aman'a yá maxte, mi hu'u har mexa. Ne bi zu'u yo'ö himi ñ'emüi, ne xa mar me yá ñö, ngetho hinxki ñ'emüi nu'u togo xki hyandi xki mengi xki nte.

16.15 Ne bi 'ñembabi'u:

—Di möhu xoge ár nxidi ar ximhai, ne xipabihu gatho ya jö'i ar hoga mhö.

16.16 Nö'ö togo da ñ'emüi ne da nixithe, ma da mpohö. Ha nö'ö togo hinda ñ'emüi, ma da t'ent'i da hñömba ár mfei Jö.

16.17 Ne nuya nt'udiyu ma da 'yot'a nu'u togo da ñ'emüi: Potka ma thuhu ma da 'yenga ya ts'ondöhi, ma da ñö ya 'ra'yo mhö,

16.18 ma da mita ya k'eñö, ne nu'mu da zi n'ar 'ñethi hote, hinte da japabi, da hñuxa yá 'ye ha ya dathi ne da dits'i.

Ar Hesu bi njuts'i bi ts'ixa mhets'i

(Lk. 24:50-53)

16.19 Mi wadi bi zo yá maxte, ar tsi Hmu bi njuts'i bi ts'ixa mhets'i, ne bi hñuxa hár ñ'ei Jö.

16.20 Ne nuyu bi boni hagatho, ma ba mönga ar hoga mhö. Ne ar tsi Hmu mi fats'i, ne mi umba ár ts'edi ár mhö ha ya nt'udi mi ot'u. Dá njap'u.